

四庫全書

史部

欽定四庫全書

唐會要卷六十三

宋 王溥 撰

史館移置

武德初因隋舊制隸秘書省著作局貞觀三年閏十二月移史館于門下省北宰相監修自是著作局始罷史職及大明宮初成置史館於門下省之南

開元十五年三月一日官臣李林甫監史以中書地切

樞密記事者宜其附近史官諫議大夫尹愔遂奏移於中書省北其地本尚藥局內藥院

諸司應送史館事例

祥瑞

禮部每季具錄送

天文祥異

太史每季并所占候詳驗同報

蕃國朝貢

每使

正遇疆勘同土地風俗衣服貢獻

蕃戎入寇及來降

表狀中書錄狀

報露布兵部錄報軍運還日軍將具

變改音及新造曲

錄陷破城堡傷殺吏人掠據畜產數

調太常寺具所州縣廢置及孝義旌表

戶部有即報

法令變

改斷獄新議

刑部有即報

有年及饑并水旱蟲霜風雹及地

震流水泛溢

戶部及州縣每有即勘其年月日及賑貸存恤同報

諸色封建司

勘報襲封者不在報限

京諸司長官及刺史都督都護行軍大總

管副總管除授

並錄制詞文官吏部送武官兵部送

刺史縣令善政異跡

有灼然者本州錄附考使送

碩學異能高人逸士義夫節婦

州縣有此色不

限官品勘知的實每年錄附考使送

京諸司長官薨卒

本司責由歷狀跡送

刺史都

督都護及行軍副大總管已下薨

本州本軍責由歷狀附便使送

公主

百官定諡

考績錄行狀諡議同送

諸王來朝

宗正寺勘報

已上事並依

本條所由有即勘報史館修入國史如史官訪知事有

堪入史者雖不與前件色同亦任直牒索承牒之處即
依狀勘並限一月內報建中元年十一月二十八日史
館奏前件事條雖標格式因循不舉日月已深伏請申
明舊制各下本司從之大歷十四年正月已後至今年
十月已前所有事跡各限勅到一月日報從此已後外
州縣及諸軍諸使每年一度附考使送納在京即每季
申便為恒例勅旨依

修前史

武德四年十一月起居舍人令狐德棻嘗從容言於高祖曰宋代已來多無正史梁陳及齊猶有文籍至於周隋多有遺闕當今耳目猶接尚有所憑如更十數年後恐事跡埋沒無可紀錄至五年十二月二十六日詔司典序言史官紀事考論得失盡究變通所以裁成義類懲惡勸善自有魏至乎陳隋莫不自命正朔懸歷歲祀各殊徽號剛定禮儀然而簡牘未編紀傳咸闕炎涼已積謠俗遷訛餘烈遺風泯焉將墜頌彼湮落用深軫悼

有懷撰次實資正直中書令蕭瑀給事中書王敬業著作郎殷聞禮可修魏史侍中陳叔達秘書丞令狐德棻太史令庾儉可修周史中書令封德彝中書舍人顏師古可修隋史大理崔善為中書舍人孔紹安太子洗馬蕭德言可修梁史太子詹事裴矩吏部郎中祖孝孫前秘書丞魏徵可修齊史秘書監竇璡給事中歐陽詢秦王府文學姚思廉可修陳史綿歷數載竟不就而罷

撰修

之源自
德棻始

至貞觀三年於中書置秘書內省以修五代史

貞觀十年正月二十日尚書左僕射房玄齡侍中魏徵
散騎常侍姚思廉太子右庶子李百藥孔穎達禮部侍
郎令狐德棻中書侍郎岑文本中書舍人許敬宗等撰
成周隋梁陳齊五代史上之進階頒賜有差

二十年閏三月四日詔令修史所更撰晉書銓次舊聞
裁成義類其所須可依修五代史故事若少學士量事
追取於是司空房玄齡中書令褚遂良太子左庶子許
敬宗掌其事又中書舍人來濟著作郎陸元佐著作郎

劉翼太史令李淳風太子舍人李義府薛元超起居郎
上官儀主客員外郎劉行功刑部員外郎辛丘馭著作
郎劉脩之光祿寺主簿楊仁卿御史臺主簿李延壽校
書郎張文恭並分功撰錄又令前雅州刺史令狐德棻
太子司議郎敬播主客員外郎李安期屯田員外郎李
懷儼詳其條例量加考正以臧榮緒書為本及十紀十
志七十列傳三十載紀其太宗所著宣武二帝及陸機
王羲之贊稱制焉房玄齡已下稱史臣凡起例皆播獨

創焉以其書賜皇太子及新羅使者各一部

顯慶元年五月四日史官修梁陳齊周隋五代志三十卷太尉無忌進之四年二月太子司更大夫呂才著隋紀二十卷其年符璽郎李延壽撮近代諸史南起自宋終於陳北始自魏卒於隋合一百八十篇號為南北史上自製序

景龍三年十二月太常少卿元行冲以本族出於後魏為未有編年之文乃撰魏典三十卷事詳文簡為學者

所稱初魏明帝時西柳谷瑞石有牛繼馬後之象魏明後史以為晉元帝是牛氏之子因姓司馬氏以應石文行冲雜尋事跡以後魏道武帝名健繼晉受命又考校識符特著論以明之

光化三年直史館柳璨以劉子玄所撰史通議駁經史過當紀子玄之失別纂成十卷號柳氏析微

國史

貞觀十七年七月十六日司空房玄齡給事中許敬宗著作郎敬播等上所撰高祖太宗實錄各二十卷太宗遣諫議大夫褚遂良讀之前始讀太宗初生祥瑞遂感

動流涕曰朕於今日富有四海追思膝下不可復得因
悲不自止命收卷仍遣編之秘閣并賜皇太子及諸王
各一部京官三品已上欲寫者亦聽永徽元年閏五月
二十三日史官太尉無忌等修貞觀實錄畢上之起貞
觀十五年至二十三年五月勒成二十卷

顯慶元年七月三日史官太尉無忌左僕射于志寧中
書令崔敦禮國子祭酒令狐德棻中書侍郎李義府著
作郎劉涓之楊仁卿起居郎李延壽秘書郎張文恭等

欽定四庫全書

修國史成起義寧盡貞觀末凡八十一卷藏其書于內
府至四年二月五日中書令許敬宗中書侍郎許圜師
太師令李淳風著作郎楊仁卿著作郎顧脢受詔撰貞
觀二十三年以後至顯慶三年實錄成二十卷添成一

百卷

是日封敬宗子選為新城縣國公圜師封平恩縣公淳風封昌樂男仁卿及脢並加諫議大夫賞修

實錄之功

上以敬宗所紀多非實錄謂仁卿等曰先朝躬擢

甲冑親履兵鋒戎衣霑馬汗兕螯生蠟蟲削平區宇康
濟生靈數年之間四海寧晏方始歸功上帝臨馭下人

昨觀國史所書多不周悉卿等必須窮微索隱原始要
終盛業鴻勲咸使詳備至如先朝作威鳳賦意屬元舅
及士廉敬宗乃移向尉遲敬德傳內又嘗幸溫湯教習
長圍四合萬隊俱前忽雲霧晝昏部伍錯亂先聖既觀
斯事恐其挂法者多遂潛隱不出待其整理然後臨觀顧
謂朕曰振旅訓兵國之大典此之錯失於法不輕我若
見之必須行法一虧軍政得罪人多我今不出良為於
此今乃移向魏徵傳內稱是徵之諫語此皆乖於實錄

何以垂之後昆朕嘗從幸未央宮辟仗已過忽於草中見一人身帶橫刀其人云辟仗至怕不敢出仗家搜索不覺遂不敢動先聖斂轡即還顧謂朕曰此事若發數人合死汝可於後堂伺看早放出之史家唯此一事差似不失其真郝處俊奏曰先聖仁恩觸類皆是臣弟處傑往年宿衛之日被差腰輦供奉見有三衛誤拂御衣此人怕懼五情無主先聖謂之曰此間無御史我不謂汝作罪過不須怕懼上謂處俊曰此亦須入史至三月

詔太子左庶子同中書門下三品劉仁軌吏部侍郎同
三品李敬玄中書侍郎郝處俊黃門侍郎高智周等並
修史仁軌等於是引左史李仁實專掌其事將加刊改
會仁實卒官又止長安三年正月一日勅宜令特進梁
王三思納言李嶠正諫大夫朱敬則司農少卿徐彥伯
鳳閣舍人魏知古崔融司封郎中徐堅左史劉知幾直
史館吳兢等修唐史採四方之志成一家之言長縣楷
則以貽勸誠

神龍二年五月九日左散騎常侍武三思中書令魏元忠禮部尚書祝欽明及史官太常少卿徐彥伯秘書少監柳冲國子司業崔融中書舍人岑義徐堅等修則天實錄三十卷文集一百二十卷上之賜物各有差開元四年十一月十四日修史官劉子玄吳兢撰睿宗實錄二十卷則天實錄三十卷中宗實錄二十卷成以聞又引古義白於執政姚崇奏曰伏見貞觀十七年監修國史房玄齡與史官給事中許敬宗著作佐郎敬播修高

祖實錄二十卷太宗實錄二十卷成制封玄齡一子為
縣男賜物一千段封敬宗南陽男賜物七百段敬播授
司議賜物五百段並降璽書褒美又神龍三年五月監
修史中書令魏元忠與史官大常少卿徐彥伯國子司
業崔融等修則天實錄三十卷成封元忠一子為縣男
物一千段彥伯等各賜爵二等物五百段自餘卑官加
兩階物段准處分仍並降璽書褒美今史官劉子玄吳
兢等撰睿宗實錄又重修則天中宗實錄並成進訖准

撰太宗實錄例監修官已下加爵及賜今子玄援引古今欲臣聞奏臣謹尋故實例有恩賞事屬當時不可為準子玄等始末修撰誠亦勤勞叙事紀言所錄雖重承恩賜命固不在多子玄等請各賜物五百段許之

至德二年十二月二十七日修史官太常少卿于休烈奏曰國史一百六卷開元實錄四十七卷起居注并餘書三千六百八十二卷在興慶宮史館並被逆賊焚燒且國史實錄聖朝大典修撰多時今並無本望委御史

臺推勘史館所由並令府縣搜訪有人收得國史實錄
能送官司重加購賞并捨其罪得一部超授官一卷賞
十疋數月准得一兩卷前修史官工部侍郎韋還賦陷
城入東京其家先藏國史一百一十三卷送官大厯三
年起居舍人兼修史令孤峘修成實錄一百卷峘著述
雖精屬喪亂之後起居注亡失纂開元天寶間事唯得
諸家文集編其詔冊名臣傳記十無三四後人以漏畧
稱之

建中元年七月左拾遺史館修撰沈既濟以吳兢所撰
國史則天事為本紀奏議駁之曰史氏之作本乎懲勸
以正君臣以維家邦前端千古後法萬代使其生不敢
差死不忘懼緯人倫而經世道為百王準的不止屬辭
比事以日繫月而已故善惡之道在乎勸誠勸誠之柄
在乎褒貶是以春秋之義尊卑輕重升降幾微髣髴一
字二字必有微旨存焉况鴻名大統其可以貸乎伏以
則天皇后初以聰明睿哲內輔時政厥功茂矣及弘道

之際孝和以長君嗣位而太后以專制臨朝俄又廢帝
或幽或陟既而握圖稱籙移運革名北司驚啄之蹤難
乎備述其後五王建策皇運復興議名之際得無降損
必將義以親隱禮從國諱苟不損下當如其常安可橫
絕彝典超居帝籍昔仲尼有言必也正名夏殷二代為
帝者三十世矣而周人通名之曰王吳楚越之君為王
者百餘年而春秋書之為子蓋高下自乎彼而是非稽
乎我過者抑之不及者援之不以弱減不為僭奪握中

持平不振不傾使其求不可得而蓋不可掩斯古君子所以慎其名也夫則天體自坤順位居乾極以柔乘剛天紀倒張進以強有退非德讓今史臣追書當稱之為太后不宜曰上孝和雖迫於母后之命降居藩邸而體元繼代本吾君也史臣追書宜稱曰皇帝不宜曰廬陵王睿宗在景龍已前天命未集徒稟后制假臨天室於倫非次於義無名史臣追書宜曰相王未宜曰帝若以得失既往遂而不舉則是非褒貶安所辨正載筆執簡

謂之何哉則天廢國家歷數用周正朔廢國家太廟立周七廟鼎命革矣徽號易矣旂裳服色已殊矣今安得以周氏年歷而列為唐書帝紀徵諸禮經是謂亂名且孝和繼天踐祚在太后之前而叙年置紀居太后之下方之躋僖是謂不智詳今考古並未為可或曰班馬良史也編述漢事立高后以續帝載豈有非之者乎答曰昔高后稱制因其曠嗣獨有分王諸呂負于漢約無遷鼎革命之甚況其時孝惠已沒孝文在下後宮之子非

劉氏種不紀呂后將誰紀焉雖云其然議者猶為不可
况遷鼎革命者乎或曰若天后不紀帝緒缺矣則二十
三年行事何所繫乎答曰孝和以始年登大位以季年
復舊業雖尊名奪而天命未改足以首事足以表年何
所拘閔裂為二紀昔魯昭之出也春秋歲書其居曰公
在乾侯且君在雖失位不敢廢也今請併天后紀合孝
和紀每於歲首必書孝和所在以統之書曰某年春正
月皇帝在房陵太后行某事改某制云云則紀稱孝和

而事述太后俾名不失正而禮不違常名禮兩得人無間矣其姓氏名諱入宮之由歷位之資才藝智畧年辰崩葬別纂錄入皇后列傳於廢后王庶人之下題其篇曰則天順聖武皇后事雖不行而史氏稱之

貞元元年九月監修國史宰臣韋執誼奏伏以皇王大典實存簡冊施于千載傳述不輕竊見自頃已來史臣所有修撰皆於私家紀錄其本不在館中褒貶之間恐傷獨見編紀之際或慮遺文從前已來有此垂闕自今

已後伏望令修撰官各撰日歷凡至月終即於館中都
會詳定是非使置姓名同共封鑰除已成實錄撰進宣
下者其餘見修日歷並不得私家置本仍請永為常式
從之

元和二年七月太僕寺丞令狐丕進亡父故史官岵所
撰代宗實錄四十卷詔付史館

五年十月宰臣裴垍與史官蔣武等撰德宗實錄五十
卷獻之

長慶二年十月勅翰林侍讀學士諫議大夫路隨中書舍人韋處厚兼充史館修撰憲宗實錄仍分日入史館修實錄未畢之前且許不入內署仍放朝參

會昌元年四月勅憲宗實錄宜令史館再修撰進入其先撰成本不得注破并與新撰本同進來者至三年十月宰臣兼監修國史李紳與修史官鄭亞等修畢進上賜銀器錦綵有差至大中二年十一月又降勅曰憲宗實錄宜施行舊本其新本委天下諸州府察訪知有寫得

者並送館不得隱藏

大中五年七月宰臣崔龜從等撰續唐歷二十卷八年三月宰臣監修國史魏謩修成文宗實錄四十卷上之史官給事中盧耽太常少卿蔣偕司勳員外郎王渢右補闕盧吉頒賜銀器錦綵有差

大順二年二月勅吏部侍郎柳玘等修宣宗懿宗僖宗實錄始丞相監修國史杜讓能三朝實錄未修乃奏吏部侍郎柳玘右補闕裴延裕左拾遺孫泰駕部員郎李

脩太常博士鄭光庭等十五人修之踰年竟不能編錄一字惟延裕採宣宗朝耳目聞覩撰成三卷目曰東觀奏紀納於史館又龍紀中有處士沙仲穆纂野史十卷起自太和終於龍紀目曰太和野史

在外修史

開元八年十二月二十日詔右羽林將軍檢校并州大都督府長史燕國公張說多識前志學於舊史文成微婉詞潤金石可以昭振風雅光揚軌訓可兼修國史仍

賡史本就并州隨軍修撰

十四年七月六日太子左庶子吳兢上奏曰臣往者長安景龍之歲以左拾遺起居郎兼修國史時有武三思張易之張昌宗紀處訥宗楚客韋溫等相次監領其職三思等立性邪佞不循憲章苟飾虛詞殊非直筆臣愚以為國史之作在乎善惡必書遂潛心積思別撰唐書九十八卷唐春秋三十卷用藏于私室雖綿歷二十餘年尚刊削未就但微臣私門凶釁頃歲以丁憂去官自

此便停知史事竊惟帝載王言所書至重倘有廢絕實
深憂懼於是彌綸舊紀重加刪緝雖文則不工而事皆
從實斷自隋大業十三年迄於開元十四年春三月即
皇家一代之典盡在於斯矣既將撰成此書于私家不
敢不奏又卷軸稍廣繕寫甚難特望給臣楷書手三數
人并紙墨等至絕筆之日當送上史館於是勅兢就集
賢院修成其書俄又令就史館及兢遷荊州司馬其書
未能就兢所修草本兢亦自將上令中使往荊州取得

五十餘卷其紀事踈畧不堪行用

十五年六月二十六日詔左丞相張說在家修史中書侍郎李元紘奏曰國史者記人君善惡國政損益一字褒貶千載稱之今張說在家修史吳兢又在集賢院撰錄令國之大典散在數所且太宗別置史館在於禁中所以重其職而秘其事望勒說等就史館參詳撰錄則典冊舊章不墜矣從之長慶三年六月中書侍郎平章監修國史杜元穎奏臣去年奉詔命各據見在史官

分修憲宗實錄今緣沈傳師改官若更求人選擇非易
沈傳師當分雖搜羅未周條目紀綱已粗有緒竊以班
固居鄉里而成漢書陳壽處私家而專精國志玄宗國
史張說在本鎮兼修代宗編年令孤叟自外郡奏上遠
考前代近參本朝皆可明徵實有成例其沈傳師一分
伏望勒就湖南修畢先送史館與諸史官參詳然後聞
奏庶使官業責成有始終之効傳聞撫實無同異之差
制可

修史官

咸亨元年十一月二十一日詔修撰國史義存典實自
今已後宜令所司於史官內簡擇堪修人錄名進內自
餘居史職不得輒聞見所修史及行用國史等事

長安一年鳳閣舍人修國史劉允濟嘗云史官善惡必
書言成軌範使驕主賊臣有所知懼此亦權重理合貧
而樂道也昔班生受金陳壽求米僕視之如浮雲耳但
百察善惡必書足為千載不朽之美談豈不盛哉三年

七月朱敬則請擇史官上表曰國之要者在乎記事之官是以五帝玄風資其筆削三王盛業藉以垂名此才之難其難甚矣何以知其然昔平王東遷歷數六百齊桓之九合天下晉文之一戰諸侯秦穆公遠霸西戎楚莊王利盡南海禮樂文物闡爾無聞今之所存獨載魯史向若魯無君子記傳則遺雄霸遠圖必墜于地可不惜哉且如齊周小國之主尚能留意于史冊齊神武嘗謂著作郎魏收曰卿勿見陳元康楊遵彥等在吾目前

趨走謂吾以為勤勞我後代聲名在于卿手最是要事
勿謂我不知及文宣即位又嘗勅曰收好直筆勿畏懼
我終不作魏太武誅史官又周文帝之為相也納柳虬
之說特命書法不諱隱其志在懲勸如此伏以陛下聖
德鴻業誠可垂範將來倘不過良史之才則大典無由
而就也且董狐南史豈祇生于往代而獨無於此時在
乎求與不求好與不好耳今若訪得其善者伏願勗之
以公忠期之以遠大更超加美職使得行其道則天下

幸甚鄭惟忠嘗問劉子玄曰自古文士多而史才少何也對曰史才須有三長謂才也學也識也夫有學而無才猶有良田百頃黃金滿籬而使愚者營求終不能置於貨殖矣如有才而無學猶思兼匠石巧若公輸而家無榘枘斧斤終不能成其宮室矣猶須好是正直善惡必書使驕主賊臣所以知懼則為虎傅翼矣時人以為知言

開元二十五年正月八日以道士尹愔為諫議大夫集

賢院學士兼知史館事特賜朝散階愔上表懇讓優詔許衣道士服視事愔乃受職

貞元九年十二月以前河南府王屋縣尉蔣武為右拾遺史館修撰上重難其職制未下前召見於延英殿至是方命官十二年正月以工部郎中史館修撰如故其年二月又命為左諫議大夫遷秘書少監修撰如故時裴延齡貴欲異同宰府乃言於上曰諫議大夫論朝廷得失之官史臣修撰紀朝廷得失之事其領史職者不

宜為諫官從之

元和四年六月宰臣集賢殿學士裴均奏史館請登朝
官入館者並為修撰非登朝並為直館修撰中以一人
官高者判館事其餘名目並請不置仍為常式從之
太和六年七月以諫議大夫王彥威戶部郎中楊漢公
祠部員外郎蘇滌右補闕裴休並充史館修撰故事修
撰不過三員或至兩員今四人並命論者非之

天祐二年五月二十九日勅翰林學士職方郎中兼史

館修撰張榮今修撰職名稍卑不稱內廷密重宜充兼
修國史

雜錄上

貞元九年十月諫議大夫朱子奢上表曰今月十六日
陛下出聖旨發德音以起居記錄書帝王臧否前代但
藏之史官人主不見今欲親自觀覽用知得失愚以為
聖德在躬舉無過事所述義歸盡善陛下獨覽之于事
無失若以此法傳示子孫竊有未喻大唐雖七百之祚

天命無改至於曾玄之後或非上智但中主庸君飾非
護短見時史直辭極陳善惡必不省躬罪已唯當致怨
史官但君上尊崇臣下卑賤有一於此何地逃刑既不
能效朱雲廷折董狐無隱排霜觸電無顧死亡唯應希
風順旨全身遠害悠悠千載何所聞乎所以前代不觀
蓋為此也

十六年四月二十八日太宗謂諫議大夫褚遂良曰卿
知起居記錄何事大抵人君得觀之否對曰今之起居

古之左右史以紀人君言行善惡必書庶幾人主不為非法不聞帝王躬自觀史太宗曰朕有不善卿必記之耶遂良曰守道不如守官臣職當筆君舉必書黃門侍郎劉洎曰設令遂良不記天下之人皆記之矣太宗謂房玄齡曰國史何因不令帝王觀見對曰國史善惡必書恐有忤旨故不得見也太宗曰朕意不同今欲看國史若善事固不須論若有惡事亦欲以為鑒誠卿可撰錄進來房玄齡遂刪畧國史表上太宗見六月四日

事語多微文乃謂玄齡曰昔周公誅管蔡而周室安季友鳩叔牙而魯國寧朕之所以安社稷利萬人耳史官執筆何煩有隱宜即改削直書其事至七月八日又謂遂良曰爾知起居記何事善惡朕今勤行三事望爾史官不書吾惡一則遠鑒前代敗事以為元龜二則進用善人共成政道三則斥棄羣小不聽讒言誓能守之終不轉也鷹犬平生所好今亦罷之雖有順時冬狩不踰旬而返亦不曾絕域訪奇異遠方求珍羞比日已來饌

無兼味自非膏雨有年師行尅捷未嘗與公等舉杯酒
奏管絃朕雖每日兢懼終藉公等匡翊各宜勉之

二十二年二月七日太宗以鐵勒諸蕃歸國謂羣臣曰
吾知勞逸不同者有二鐵勒輸忱歸國去危就安邊夷
無事豈不逸樂而窮髮之地盡為齊人古昔已來書史
不載今日起居記朕功業亦為勦勞

顯慶二年二月已後禮部尚書許敬宗常修國史自掌
知國史記事阿曲初虞世南兄與許敬宗父同為宇文

化及所害封德彝時為內史舍人備見其事因謂曰虞
世基被戮世南則匍匐而請死許善心被殺敬宗則舞
蹈以求生敬宗聞而銜之及為德彝立傳咸加其罪惡
敬宗嫁女與左監門大將軍錢九隴本皇家隸人敬宗
利其資而與之婚乃與九隴曲叙門閥妄加功貴并昇
與劉文静長孫順德同卷敬宗子娶尉遲寶琳孫女多
得賂遺及作寶琳父敬德傳乃云太宗作威鳳賦以錫
之其威鳳賦本是與長孫無忌又白州人龐孝恭蠻首

凡品率鄉兵從征高麗賊知其懦襲破之敬宗又納其
寶貨稱漢將驍健者唯蘇定方龐孝恭耳曹繼叔劉伯
英皆出其下其虛謬也如此高祖太宗實錄敬播所修
頗多詳直敬宗又輒以已愛憎曲事刪改論者尤之

長壽二年修時政紀先是永徽已後左右史唯得對仗
承旨仗下後謀議皆不聞文昌左丞姚璩以為帝王謀
訓不可遂無紀述若不宣自宰相即史官踈遠無得而
書之是日遂表請仗下所言軍國政要即宰相一人撰

錄號為時政紀自唐始也



欽定四庫全書

唐會要
卷六十三

二十四

唐會要卷六十三

欽定四庫全書

史部

唐會要卷六十四至

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣陸湘

膳錄監生臣王宮

欽定四庫全書

唐會要卷六十四

史館雜錄下

宋 王溥 撰

長安三年張易之昌宗欲作亂將圖皇太子遂譖御史大夫知政事魏元忠昌宗奏言可用鳳閣舍人張說為証說初不許遂賂以高官說被逼迫乃偽許之昌乃奏元忠與太平公主所寵司禮丞高戢交通密謀構造飛

語曰主上老矣吾屬當挾皇太子可謂耐久時則天春秋高惡聞其語鳳閣侍郎宋璟恐說阿意乃謂曰大丈夫當守死善道殿中侍御史張廷珪又謂曰朝聞道夕死可矣起居郎劉知幾又謂曰無污青史為子孫累明日上引皇太子相王及宰相等於殿庭遣昌宗與元忠高戢對於上前上謂曰具述其事說對曰臣今日對百寮請以實錄因厲聲言魏元忠實不反總是昌宗令臣誣枉耳是日百寮震懼上聞說此對謂宰相曰張說傾

巧翻覆小人且總收禁侍更勘問異日又召依前對問
昌宗乃屢誘掖逼促之說視昌宗言曰乞陛下看取天
子前尚逼臣如此况元忠實無反語柰何欲令臣空虛
加誣其罪今大事去矣伏願記之易之昌宗必亂社稷
天后默然令所司且收掌諫議大夫知政事朱敬則密
表奏曰魏元忠素稱忠正張說又所坐無名俱令抵罪
恐失天下之望願加詳察乃貶元忠為高要尉說流欽
州

時人議曰昌宗等包藏禍心遂與說計議欲擬謀害
大臣宋璟等知說巧詐恐損良善遂與之言令其內

省向說元來不許昌宗虛證元忠必無今日之事乃是自招其咎賴識通變轉禍為福不然皇嗣殆將危矣

後數年說拜黃門侍郎同中書門下平章事因至史館

讀則天實錄見論証對元忠事乃謂著作佐郎兼修史

吳兢曰劉五修實錄

劉五即子玄也

論魏齊公事乃不相饒假

與說毒手當時說驗知是吳兢書之所以假託劉子玄

兢從容對曰是兢書之非劉公修述草本猶在其人已

亡不可誣在於幽魂令相公有怪耳同修史官蘇宋等

見兢此對深驚異之乃嘆曰昔董狐古之良史即今是

馬說自後頻祈請刪削數字兢曰若取人情何名為直
筆

景龍二年四月二十日侍中紀處訥中書令楊再思兵
部侍郎宗楚客中書侍郎蕭至忠並監修國史其後史
官太子中允劉知幾以監修者多甚為國史之弊於是
求罷史職奏記於蕭至忠曰知幾自策名仕伍侍罪朝
列三為史臣再入東觀竟不能勒成國典貽彼後來者
何哉靜言思之有不可五也何者古之國史皆出自一

家如魯漢之丘明子長晉齊之董狐南史咸能立言不
朽藏諸名山未聞藉以衆功方云絕筆唯後漢東觀大
集羣儒著述無序條章靡立由是伯度譏其不實公理
以為可焚張蔡二子紕之於當代傳范兩家嗤之於後
葉今者史司取士有倍東京人自以為荀袁家自稱於
政駿每欲記一事載一言皆閣筆相視含毫不斷故首白可期
而汗青無日其不可一也前漢郡國計書先上太史副上丞相
後漢公卿所撰始集公府乃上蘭臺由是史官所修載事為

博爰自近古此道不行史臣編錄唯自詢採而左右二
史闕注起居衣冠百家罕通行狀求風俗于州縣視聽不
該討沿革於臺閣簿籍難見其不可二也昔董狐之書
法也以示於朝南史之書弒也執簡以往近代史局皆
通籍禁門幽居九重欲人不見尋其義者蓋由杜彼顏
面防諸請謁故也然今館中作者多士如林皆願長喙
無聞齟舌倘有五始初成一字加貶言未絕口而朝野
具知筆不洒毫而縉紳咸誦夫孫盛實錄取嫉權門王

韶直書見讎貴族人之情也能無畏乎其不可三也今
史官注記多取稟監修楊令公則云必須直詞宋尚書
則曰宜多隱惡十羊九牧其命難行一國三公適從焉
在其不可四也竊以史官監修雖無古式尋其名號可
得而言夫監者蓋總領之義耳如創紀編年則年有斷
限草傳叙事則事有豐約或可畧而不畧或應書而不
書此刊削之務也屬詞比事勞逸宜均揮鉛奮墨勤惰
須等某帙某篇付之此職某紀某傳歸之彼官此銓配

之理也斯並宜明立科條審定區域倘人思自勉則書可立成監之者既不指授修之者又無遵奉坐變炎涼徒延歲月其不可五也而時談物議焉得笑僕編次無聞者哉至忠惜其才不許解史職宗楚客嫉其正直謂諸史官曰此人作書如是欲置我於何地知幾又著史通二十卷

開元五年十月十八日詔曰王者欽若天道率由時令考六官之化循五紀之法故得災害不生休徵洊委夫

正月東郊祈春賞士孟冬北陸迎寒恤孤叅四序之運
行稽五材之動用不協所尚或罹於咎自今已後每八
月史官條奏應所行事當斟酌典禮用孚於休宣布朝
廷使知朕意

至德二年六月二十三日上謂史官于休烈曰君舉必
書朕有過卿宜書之休烈對曰臣聞禹湯罪己其興也
勃焉有德之君不忘書過臣不勝慶

永貞元年九月河陽三城節度使元韶卒史臣曰凡功

名不足以垂後而善惡不足以為誠者雖富貴人第書其卒而已陶清劉舍許昌薛澤莊青翟趙周皆為漢相爵則通侯而良史以為齷齪廉謹備員而已無能發明功名者皆不立傳伯夷莊周墨翟魯連王符徐穉郭泰皆終身匹夫或讓國立節或養德著書或出奇排難或守道避禍而傳與周召管晏同列故富貴者有所屈貧賤者有所伸孔子曰齊景公有馬千駟死之日人無得而稱焉伯夷叔齊餓于首陽之下人至于今稱之然則

志士之欲以光輝于後者何待于爵位哉富貴之人排
肩而立卒不能自垂於後者德不修而輕義重利故也
自古及今可勝數乎

元和四年正月減集賢寫御書二十人付史館收管史
館奏當館舊制例只有楷書無御書各額請改正楷書
從之

六年四月史官左拾遺樊紳右拾遺韋處厚太常博士
林寶並停修撰守本官以考功員外郎獨孤郁充史館

修撰兼判官事又以兵部尚書裴均為太子賓客均以疾罷相拜兵部尚書久未任朝請宰相李吉甫自淮南至復監修史與均有隙又以均投病方退不宜以貞元實錄上進故史官皆罷均亦更移散秩

七年六月上讀肅宗實錄見大臣傳多浮詞虛美因宣與史官記事每要從實不得虛飾

八年十月宰臣以下候對于延英殿上以時政記問於宰臣監修國史李吉甫對曰是宰相記天子事以授史

官之實錄也古者左史記言今起居郎是也右史記動
今起居舍人是也永徽中宰臣姚璹監修國史慮其造
膝之言或不下聞因請隨奏對而記于仗下以授史官今時
政記是也上曰其間或修或不修者何也吉甫對曰凡
面奉德音未及施行總謂機密固不可書以送史其間
謀議有發自臣下者又不可自書以付史官及事已行
者制旨昭然天下皆得聞知即史官之記不待書以授
也且臣觀時政記者姚璹修於長壽及璹罷而事廢賈

耽齊抗修於貞元及耽罷而事廢然則關於政化者不
虛美不隱惡謂之良也

十二年九月詔記事史官是職昭其法誠著在舊章舉
而必書朕所深望自今以後每坐日宰臣及諸司對後
如事可備勸誠合在記述者委承旨宰相宣示左右起
居綴錄仍准舊例每季送史館時起居舍人庾敬休上
疏請行故事因有是詔既而宰相以事關機密不以告
之事竟不行自左右史失職于今幾一百五十年中間

往往有時政記出焉既錄因宰相事同稱贊推美讓善之道將如信史直書之義闕然於時尚十得其四五今則全廢君子惜之

十四年四月史官李翱奏臣等謬得秉筆史館以記錄為職夫勸善懲惡正言直筆記聖朝功德述忠賢事業載姦佞醜行以傳無窮者史官之任也凡人之事跡非大善大惡則衆人無由知之舊例皆訪問於人又取行狀謚議以為一據今之行狀者非門生即其故吏莫不

虛加仁義禮智妄言忠肅惠和如此不唯處心不實苟
欲虛美於所受恩而已也蓋亦為文者既非游夏遷雄
之列務於華而忘其實溺於詞而棄其理故為文則失
六經之古風紀事則非史遷之實錄不然則詞句鄙陋
不能自成其文矣由是事失其本文害於理而行狀不
足以取信若使指事書實不飾虛言則必有人知其真偽不
然者縱使門生故吏為之亦不可謬作德善之事而加
之矣臣今請作行狀者但指事說實直載其詞則善惡功

跡皆據事足以自見矣假令傳魏徵但記其諫諍之詞
自足以為正直矣如傳段秀實但記其倒用司農寺印
以追逆兵又以象笏擊朱泚自足以為忠烈矣若考功
定謚行狀之不依此者不得言謚依此者乃下太常及
牒史館太常定謚後亦以謚議牒送史館則行狀之言
縱未可以一一皆信與虛加妄言都無事實者猶山澤高
下之不同也史氏記錄須得本末苟憑往例皆是虛言
則使史官何所為據伏乞下臣所奏使考功守行臣等

要知事實輒敢陳論制可

其年六月史館奏當館楷書准元勅同集賢例五考足放選今選務集賢年數仍舊當館更加三年同弘文館例八年放選緣當館一例長上弘文館分番上下事理實屈請依元勅處分勅旨依奏

長慶元年正月史館奏寫國史楷書元額三十員內十員館司前後停減五員吏部奏減今只十五員見在伏請却復吏部先減五員勅旨宜量與三員其年二月史

館奏楷書典書等授官次叙伏請勅吏部同集賢例比擬勅二日宜準集賢例處分

其年四月修聖政紀中書門下奏伏以堯舜之政二典存焉君臣之間吁俞之旨罔不備載厥後雖代有史官多才出於追書所以其事或絕其言蓋畧太宗文皇帝躬勤庶政朝多良臣論思獻替動可紀錄故能遠繼堯舜煥乎其文章朝廷舊制每正衙奏事史官載筆於玉階之下所有議論政事悉得聞之及永徽後仗下便退

宰臣謀議外莫得聞長壽二年宰相姚璩以為聖王謀
訓不可闕於紀述史官疎遠無因得書請自今已後所
論軍國政要委宰相一人撰錄號為時政記此事久廢
史官不復得聞唯寫誥詞記除授而已臣等常竊悵憤
大懼皇猷未有以光揚于天下伏望天恩許臣等每坐
日所有謀議事關政事者便日撰錄號為聖政記書紀
緘封至歲末則付史官永為常式庶得睿謀所載如日
月高懸聖政惟新與天地廣運臣等不勝大願從之

太和二年中書侍郎監修國史路隨奏曰臣昨面奏聖
旨以順宗實錄頗非詳實委臣等重加刊正畢日間奏
伏以史冊之作勸誠所存事有當書理宜歸實匹夫善
惡尚不可誣人君得失無容虛載況貞觀已來累朝實
錄有經重撰不敢固辭緣此書成於韓愈今史官李漢
蔣係皆愈之子壻若遣參校或致私嫌臣既職編修合
命詳正及經奏請事遂施行今庶寮競言表章交奏既迫
羣議輒冒上聞且韓愈所書亦非已出元和之後已是

相循縱其密親豈害公理使歸本職實謂正名其實錄
伏望取舊記最錯誤者宣付史館委之修定詔曰其實
錄中所書德宗順宗朝禁中事起於謬傳殊非信史宜
令史官詳正其他不要更脩初韓愈撰順宗實錄說禁
中事頗切直內官惡之於上前言其不實故令刊正也
開成三年二月中書門下奏延英對宰相須紀錄伏以
陛下躬勤庶政超邁百王每對宰臣日旰忘倦正衙決
事二史在前便殿坐日全無紀錄長壽初宰臣姚璹奏

置時政紀寢而不行貞元中宰臣趙憬請復故事無何
又廢恭惟聖政必在發明今請每至延英坐日對宰臣
往復之詞闕教化政刑之事委中書門下直日紀錄月
終送史館所冀政猷不墜國史有倫昨日延英面奏已
蒙允許勅旨依奏

會昌三年十月中書門下奏時政紀起居注紀修國史
體例等伏以時政紀長壽二年宰臣姚璩以為帝王謨
訓不可闕於紀述史官疎遠無因得書請自今已後所

論軍國政要宰臣一人撰錄號為時政紀厥後因循多
闕紀述臣等商量爾後坐日每聞聖言如有慮及生靈
事闕興替可昭示百代貽謀後昆者宰臣獻替謀猷有
益風教並請依國朝故事其日知印宰相撰錄連名封
印至歲末送史館起居注紀比者不逐季撰錄至有去
官三五年後猶未送納者伏以每度延英奏事後向外
傳說三事猶兩事虛謬豈有起居注紀皆三數年後撫
拾傳聞耳目已隔固非實事向後起居注紀事望每季

初即送納向前一季文書與史館納訖具狀申中書門下史館受訖亦申報中書門下其起居改轉望已注紀遲速為殿最如有軍國大政傳聞疑誤仍許政事都堂見宰相等臨時酌量如事已施行非關機密並一一向說所冀書存信實免有疑誤修史體例臣等伏見近日實錄多云禁中者伏以君上與宰臣及公卿言皆須衆所聞見方合書於史策禁中之語向外何由得知或得於傳聞多出邪佞便載史筆實累鴻猷向後日錄中如

有此類並請刊削更不得以此紀述又宰臣及公卿論
事行與不行須有明據或奏議允愜必見褒稱或所論
乖僻固有懲責在藩鎮獻表者有答詔居要官啓事者
亦合著明並當昭然在衆人耳目或取捨在於堂案或
與奪形於詔勅前代史書載名目奏議無不由此近見
實錄多載密疏言不彰其明聽事不顯於當時得自其
家實難取信向後所載羣臣章奏其可否得失須朝廷
共知者方可紀述密疏並請不載如此則書必可法人

皆守公愛憎之志不行褒貶之言必信伏見近日實錄事多紕繆若詳求撫實須舉舊章勅旨宜依大中四年四月史館奏當館寫國史楷書典書等與集賢院寫書人等承前一例並校成五考便勒赴選自太和八年已後被吏部條奏疏五考滿後待受散三年今集賢院以其勞役年深不得補入去年三月十三日具事由申奏已蒙勅下並免三年受散訖今當館未蒙處分伏請依例並勒校成五考便許參選勅旨依奏

八年正月監修國史鄭朗奏當館修撰直館共四員准
故事以未通籍為直館伏以修史重事合置修撰諸臣
秩次或卑筆削不稱其直館伏請停廢更添修撰二員
從之其舊館萬年尉張範涇陽尉李節勒守本官以戶
部郎中孟穆駕部員外郎李渙並充修撰通舊為四員
分修四季之事

天祐元年十月十三日前絳州曲沃縣令高處魯進史
館亡書三百六十卷授兼監察御史賜緋

弘文館

武德四年正月于門下省置修文館至九年三月改為弘文館至其年九月太宗初即位大闡教于弘文殿聚四部羣書二十餘萬卷於殿側置弘文館精選天下賢良文學之士虞世南褚亮姚思廉歐陽詢蔡允恭蕭德言等以本官兼學士令更宿直聽朝之隙引入內殿講論文義商量政事或至夜分方罷今褚遂良檢校館務號為館主因為故事其後得劉祿之范履冰並特勅相

次為館主貞觀三年移於納義門西九年又移於門省
南其後移伏大明宮其館亦在門下省南儀鳳中以館
中多圖籍置詳正學士校理之神龍元年十月十九日
改為昭文館避孝敬諱故也二年又改為脩文館至景
龍二年四月二十二日脩文館增置大學士四員學士
八員直學士十二員徵攻文之士以充之二十三日勅
中書令李嶠兵部尚書宗楚客並為大學士二十五日
勅秘書監劉憲中書侍郎崔湜吏部侍郎岑義太常卿

鄭愔給事中李適中書舍人盧藏用李文太子中舍劉
子玄並為學士五月五日勅吏部郎中薛稷考功員外
郎馬懷素戶部員外郎宋之問起居舍人武平一國子
主簿杜審言並為直學士十月四日兵部侍郎趙彥昭
給事中蘇頲起居郎沈佺期並為學士景雲元年館中
學士多以罪被貶黜宰臣遂令給事中一人權知館事
二年三月八日復改為昭文館至開元七年九月四日
依舊改為弘文館學生三十八人補弘文館如崇文學

生例皇總麻已上親皇太后大功已上親散官一品中書門下三品同中書門下平章事六尚書功臣身食實封者京官職事正品供奉官三品子孫京官職事從三品中書黃門侍郎子並聽預簡選性識聰敏者充貞觀元年勅見在京官文武職事五品已上子有性愛學書及有書性者聽于館內學書其書法內出其年有二十四人入館勅虞世南歐陽詢教示楷法黃門侍郎王珪奏學生學書之暇請置博士兼隸業馬勅太學助教侯

孝遵授以經典著作郎許敬宗授以史學至二年王珪
又奏請為學生置講經博士考試經業准式貢舉兼學
書法

開元二年正月弘文館學士直學士學生情願夜讀書
及寫供奉書人榻書人願在內宿者亦聽之又弘文館
令學士一人專判館事并差給事中一人差知勾當明
為簿歷其學生既在官宿博士及直館每夜各一人遞
直開元七年十二月三日省弘文崇文兩館雙校置弘

文館校書四員崇文館校書兩員

二十二年二月二十五日省弘文館校書兩員

長慶二年閏十月弘文館奏楷書榻書典書元額三十
五員七員先停減今請于先減數內量補五員并見在
員數並勒長寫書及功課年勞官資請依史官例處分
勅旨宜依

三年二月弘文館奏請添修屋宇及造書樓伏以儒學
之科政化根本苟或隳廢則人何觀伏望賜勅所司遂

急補修庶使已成之業免墜弘闡之義再揚勅旨依奏
其年七月弘文館奏按六典當館先有學士直學士詳
正學校理直館讐校錯誤講經博士等雖職事則同名
目稍異須有定制使可遵行今請准集賢史館兩司元
和中停減雜名目例其登朝五品以上充學士六品已
下充直學士未登朝官一切充直弘文館其餘並請停
減異得典故不煩職業咸在勅旨依奏

大中四年七月弘文館奏當館楷書典書等與集賢史

館楷書等承前流例並勒校成五考赴選自太和八年以後被吏部條流更加授散三年今集賢史館奏勞役年深補召不得已蒙勅下免三年授散訖今當館請准例處分勅旨依奏

六年六月弘文館奏伏以三館制置既同事例宜等此來無事未敢申論今緣准勅修續會要以來官僚入日稍頻因緣費用其數至多紙筆雜物等不敢別有申請其厨料從前欠少伏請准兩館流例增添給用之間庶

得濟辦勅旨宜事畢日停

文學館

武德四年十月秦王既平天下乃銳意經籍於宮城之西開文學館以待四方之士于是以僚屬大行臺司勳郎中杜如晦記室考功郎中房玄齡及于志寧軍諮祭酒蘇世長天冊府記室薛收文學褚亮姚思廉太學博士陸德明孔穎達李玄道天冊倉曹李守素記室參軍虞世南蔡允恭顏相時著作佐郎攝天冊記室許敬宗

薛元敬太學助教蓋文達軍諮典籤蘇勗等並以本官兼文學館學士及薛收卒徵東虞州錄事參軍劉孝孫入館令庫直閣立本圖其狀具題其爵里命褚亮為文贊號曰十八學士寫真圖藏之書府用彰禮賢之重也諸學士食五品珍膳分為三番更直宿閣下每日引見討論文典得入館者時人謂之登瀛洲

崇文館

顯慶元年三月十六日皇太子弘請於崇賢館置學士

并置生徒詔許之始置二十員其東宮三師三少賓客
詹事左右庶子左右衛率及崇賢館三品學士子孫亦
宜通取至上元二年八月二十七日改崇賢館為崇文

館

避章懷太子諱也

永隆二年二月六日皇太子親行釋奠之禮禮畢上表
請博延耆碩英髦之士為崇文館學士許之於是薛元
超表薦鄭祖玄鄧玄挺楊炯崔融等並為崇文學士至
貞元八年四月二十八日崇文館宜令左春坊勾當

集賢院

西京在光順門大衢之西命婦院北本命婦院之地開元十一年分置北院全取命婦院舊屋東都在明福門外大街之西本太平公主宅十年三月始移書院於此西向開門院內屋並太平公主所造興慶宮院在和風門外橫街之南二十四年駕在東都張九齡遣直官魏光祿先入京造此院華清宮院在宮北橫街之西二十八年勅造書直及寫御書一百人

開元五年十二月勅于秘書省昭文館兼廣召諸色能書者充皆親經御簡後又取前資常選三衛散官五品已上子孫各有年限依資甄叙各有至十九年勅有官者為直院

開元五年十一月題為麗正修書院以秘書監馬懷素右散騎常侍褚無量充使初置院經始皆無量處置至八年正月以散騎常侍元行冲充使檢校院內修撰官初無量奏前聞喜縣尉盧撰前江陽縣尉陸玄泰前左

監門曹參軍王擇從武陵縣尉徐楚璧分庫檢校至
六年已後秘書丞殷承業右贊善大夫魏哲通事舍人
陸元愷右內率府兵曹參軍劉懷信胡履恭陸令言陸
紹伯扶風縣丞馬利貞並別勅收入院

八年十月勅學士等入經三年已上為年深若校理精
勤紕繆多正及不詳覆無所發明委修書使錄奏別加
褒貶

九年冬幸東都時集賢院四庫書總八萬九十卷經庫

一萬三千七百五十三卷史庫二萬六千八百二十卷
子庫二萬一千五百四十八卷集庫一萬九千八百六
十九卷至二十四年車駕還西京勅百司行從皆令減
省集書籍三分留一貯在庫者至天寶三年六月四庫
更造見在庫書籍經庫七千七百六卷史庫一萬四千
八百五十九卷子庫一萬六千二百八十七卷集庫一
萬五千七百二十二卷從天寶三年至十四載四庫續
寫書又一萬六千八百三十二卷

十三年四月五日因奏封禪儀注勅中書門下及禮官
學士等賜宴于集僊殿上曰今與卿等賢才同宴于此
宜改集僊殿麗正書院為集賢院乃下詔曰僊者捕影
之流朕所不取賢者濟理之具當務其實院內五品已
上為學士六品已下為直學士中書令張說充學士知
院事散騎常侍徐堅為副禮部侍郎賀知章中書舍人
陸堅並為學士國子博士康子元為侍講學士考功員
外郎趙東曦監察御史咸廩業左補闕韋述李釗陸玄

秦呂向拾遺母照太學助教余欽四門博士敬會默校書郎孫季良並直學士太學博士侯行果四門博士敬會直右補闕馮暉並侍講學初以張說為大學士辭曰曰學士本無大稱中宗欲以崇寵大臣景龍中修文館有大學士之名如臣豈敢以大為稱上從之

貞元四年正月勅減集賢寫御書一十人付史館收管其年六月集賢院准六典有學士及直學士准集賢注記外有校理待制留院入院侍講刊校修撰修書及直

院等色類徒多等目無益今請登朝官五品已上准六
典為學士六品已下為直學士學士中取一人最高者
判院事闕學士即以直學士中高者充自餘非登朝官
不問品秩並為校理其餘名一切勒停仍永為常式從
之

其年五月十一日中書侍郎同中書門下平章事李泌
奏伏蒙以臣為集賢殿大學士竊尋故事中書令張說
中朝元老碩德鴻儒懇辭大字衆稱達禮其後至德二

年崔圓為相加集賢殿大學士其後因循遂成恒例伏望削去大字崇文館大學士亦准此勅依

八年六月十三日置集賢殿校書四員正字兩員仍于秘書省見任校書正字中量減秘書省所減官員便據數置

十八年上問神策軍起置之由相府討求不知所出乃召集賢學士蔣乂問之又徵引根源事皆詳悉宰臣高郢鄭珣瑜曰集賢有人矣翌日制判集賢院事又集賢

院學士蔣明之子其父常以亂兵之後圖籍溷雜乃白執政攜入入院編次於是宰相張鑑置入為集賢編錄元和二年七月集賢院奏伏准六典集賢院置學士及校理修撰官累聖崇儒不失此制至貞元八年判院事官陳京始奏停校理秘書郎四員正字兩員為集賢殿校理正字今請校書郎正字並却歸秘書省當司請依舊置校理官庶循名實且復開元故事又直官請減五人寫御書請減十人從之其年閏十二月集賢殿大

學士中書侍郎平章事武元衡奏以厨料欠少更請本
錢一千貫文收利充用置捉錢四人其所置請用直官
及寫御書各兩員每員捉錢二百五十貫文為定額即
免額外置人勅旨已配捉錢人宜至年滿准舊例處分
其闕便停不得更補餘依奏

太和五年正月集賢殿奏應投勘宣素書籍等伏請準
前年三月十九日勅權抽秘書省及春坊弘文館崇文
館見任校正作番次就院同校其厨料請準元勅處分

事畢日停從之

開成元年四月集賢殿御書院請鑄小印一面以御書為印文從之

大中六年正月校理楊收逢侍御史馮緘與三院退朝入臺收不為之却乃追捕僕人笞之時宰臣大學士馮植論奏始著令三館學士不避行臺自植始也

崇玄館

開元二十九年正月三日于玄元皇帝廟置崇玄博士

一員令學生習道德經莊子文子列子待習業成後每年隨貢舉人例送至省准明經例考試

天寶元年五月中書門下奏兩京及諸郡崇玄館學生等准開元二十九年正月十五日制前件舉人合習道德南華通玄沖虛等四經又准天寶元年二月十日制改庚桑子為洞靈真經准條補崇玄學生亦合習讀伏准後制合通五經其洞虛真經人間少本近令諸觀尋訪道士等全無習者本既未廣業實難成并通玄沖虛

二經亦恐文字不定立教方闡學者宜精其洞靈真經等三經望付所司各寫十本校定訖付諸道採訪使頒行其貢舉司及兩京崇立學亦望各付一本今冬崇立學舉人望准開元二十九年勅條考試其洞靈真經請待業成然後准式從之

二年正月十五日改崇立學為崇立館博士為學士助教為學士更置大學士二員天下諸郡崇立學改為通道學博士為學士二月四日以門下侍郎陳希烈兼崇

玄館學士其年二月十二日勅兩京玄元宮及道院等
並委崇玄館學士都檢校貞元六年十二月給事中盧
微奏太清宮崇玄館元置楷書二十人寫道經已足請
不更補置勅旨依奏

唐會要卷六十四

欽定四庫全書

唐會要卷六十五

宋 王溥 撰

秘書省

龍朔二年二月四日改為蘭臺其監為蘭臺太史少監
蘭臺侍郎丞為蘭臺大夫咸亨元年十月二十三日各
復舊額光宅元年九月五日改為麟臺監餘並隨名改
神龍元年二月五日復改為秘書監如舊

少監 武德初因隋舊制號秘書少令七年省貞觀四年十一月復置一員以虞世南為之太極元年二月加一員以崔琳為之

秘書郎 本四員開元二十八年減一員

校書郎 本八員開元二十六年正月二十八日省四員天寶十三年正月十三日却置

正字 本二員開元二十六年減一員天寶十三年却置貞元八年六月割校書四員正字兩員屬集賢院

著作局 龍朔二年改為司文局著作郎咸亨元年却依舊

著作郎 本四員開元二十六年正月二十八日減兩員掌修史貞觀二十三年閏十二月置史館於門下省宰臣監史自是著作罷史任

貞觀六年三月上幸九成宮宮人還京憩於漳川縣官舍俄有右僕射李靖侍中王珪復至官屬移宮人別所而舍靖等唯參謁靖等又不敬宮人上聞之怒曰威福

之柄豈由靖等何為禮靖而輕我宮人即令按問秘書
監魏徵諫曰靖等陛下心膂大臣宮人皇后掃除之隸
論其委付事理不同又靖等出外官吏訪聞朝廷法式
歸來陛下問疾苦靖等自當與官吏相見官吏亦不可
不謁至于宮人供食之外不合參承若以此罪責縣官
恐不益德音徒駭天下耳目

七年九月二十三日上謂侍臣曰朕因暇日每與秘書
監虞世南商量今古朕一言之善虞世南未嘗不悅有

一言之失未嘗不悵恨嘗戲作豔詩世南進表諫曰聖
作雖工體制非雅上之所好下必隨之此文一行恐致
風靡輕薄成俗非為國之利賜令繼和輒申狂簡而今
之後更有斯文繼之以死請不奉詔旨羣臣皆若世南
天下何憂不理因顧謂世南曰朕更有此詩卿能死否
世南曰臣聞詩者動天地感鬼神上以風化下下以風
應上故季札聽詩而知國之興廢盛衰之道實繼于茲
臣雖愚誠願不奉詔

大曆十四年九月二十七日勅秘書省書閣內書自今
後不得輒供諸司及官人等每月兩衙及兩府委秘書
郎典書等同檢校遞相搜出仍舊封閉貞元二年七月
秘書監劉太真上言請擇儒者詳校九經于秘書省令
所司陳設及使食物宰臣錄其課効從之議者謂秘書省有校書正
字員十六員職在校理今授非其人乃別求儒者詳定
費於供應煩于官寮太真之請失之甚矣尋阻衆議果
寢不
行

三年八月秘書監劉太真奏准貞元元年八月二日勅

當司權宜停減諸色糧外紙數內停減四萬六千張續
准去年八月十四日勅修寫經書令諸道供寫書功糧
錢已有到日見欲就功伏請於停減四萬六千張內却
供麻紙及書狀藤紙一萬張添寫經籍其紙寫書足日
即請停又當司准格楷書八年誠優今所補召皆不情
願又准今年正月十八日勅諸道供送當省寫經書及
校勘五經學士等糧食錢今緣召補楷書未得解書人
元寫經書其歷代史所有欠闕寫經書畢日餘錢請添

寫史書從之

元和三年三月詔秘書省弘文館崇文館左春坊司經局校書正字宜委吏部自今以後於平留選人中加功訪擇取志行貞潔藝學精通者注擬綜覈才實惟在得人不得限以登科及判入等第其校書正字限考入畿縣尉簿任依常格

長慶三年四月秘書少監李隨奏當省請置秘書閣圖書印一面伏以當省御書正本開元天寶以來前並有

小印印縫自兵難以來書印失墜今所寫經史都無記
驗伏請鑄造勅旨依奏

開成元年七月分察使奏秘書省四庫見在雜舊書籍
共五萬六千四百七十六卷並無文案及新寫書文歷
自今以後所填補舊書及別寫新書并隨日校勘並勒
創立案別置細歷隨月申臺并申分察使每歲末課申
數並具狀聞奏勅旨依

九月勅秘書省集賢院應欠書四萬五千二百六十一

卷配諸道繕寫

殿中省

武德初因隋舊制為殿內省三年改殿中省龍朔二年改為中御府監為中御大監咸亨元年復舊

少監 本二員上元元年八月加一員以唐修睦為之
殿中丞 龍朔二年改為中御大夫咸亨元年復舊
尚醫局 奉御二員龍朔二年改為奉醫局奉御為大夫諸局准此咸亨元年並復舊天寶元年惟留一員

尚膳局 准上改為奉膳局

尚衣局 准上改為奉冕局

尚舍局 准上改為奉宸局

尚輦局 准上改為奉輦局

尚乘局 准上改為奉駕局至開元二年始以尚乘局

隸閑廐使設奉御二員高宗命加至四員分掌六閑一

曰飛黃閑二曰吉良閑三曰龍媒閑四曰駒駉閑五曰

駉駉閑六曰大宛閑

欽定四庫全書

唐會要
卷六十五

六

神龍元年八月二十三日勅內宴王公日尚食局進供
客食於閣門付品官將入其局官等非別勅喚不得輒
自下飲食

開元五年十月二日勅尚藥局醫官王公已下不得輒
奏請將外醫療

十年五月九日勅尚藥局御藥庫每月支監門二人守
當

二十八年四月十三日殿中監奏尚食局無品直司六

人並是巧兒曹司要籍一任直司主食十年考滿同流外授官仍補額內直驅使比來有闕多被諸色人請射此輩遂無進路今復有闕望請先授妄來請射不在補限勅旨從之

貞元十五年四月勅殿中省尚藥局司醫宜更置一員醫佐加置兩員仍並留授翰林醫官所司不得注擬十二月殿中省初置郎御尚醫四員每月各給料錢二十五貫文資品同詹事府丞

元和三年五月殿中省奏勅當司尚膳尚衣尚舍尚藥
尚輦等共五局伎術直官聽在外州府官來直本司伏
以五局所置官不請課料若不授伎術官即多逃散伏
請宣付吏部准舊例處分勅旨依奏

長慶三年三月詔每日供御及供宮內食料等一物已
上各委本司商量節減仍具所費用數速分析聞奏當
付度支管計添充經費

開成三年八月殿中省奏尚藥局舊額主膳八百四十

人充三番每月役使二百八十人今請條流量閒劇分
為四番每月勅二百一十人當上即每日有主膳七十
人糧請迴給正額未請糧色巧兒添主膳驅使不得別
申請度支糧伏乞聖慈許臣當司自圓融與得均濟又
免占破府縣人戶色役勅旨依奏

進馬 天寶八載七月二十五日勅自今以後南衙立
仗馬宜停其進馬官亦省十二年楊國忠又奏置立仗
馬及進馬官貞元七年兵部奏進馬所用蔭同千牛仍

兼取侍御史中丞給事中中書舍人遷除條例及簡試
並用千牛例

太和八年三月殿中省奏千牛元額四十八員左右伏
各二十四員准每仗各減一十四員訖又進馬元額一
十八員當司六員今准勅減一員僕寺准減一員勅旨
宜依

閑廐使

萬歲通天元年五月置仗內閑廐令殿中丞袁懷哲檢

校未置使至聖歷三年二月改殿中少監充閑廐使懷
哲改名忠臣後遂設閑廐使袁忠臣再任田歸道翟無
言又宗晉卿武崇訓賀蘭爽張涉號王邕孫佺平王隆
基宗王成器新興王晉崔日知王毛仲皇甫忠姜皎王
暉楊崇慶來曜牛仙客李元祐韋章仇兼瓊安祿山呂
崇賁李輔國彭盈藥子昂常謙光常休明崔宣張獻恭
李齊運大歷十四年七月十日閑廐奏馬當使准例每
日于月華門立馬兩疋仗下歸廐去廣德元年蕃寇後

使司典使頻申論飛龍不支自後未置臣忝職司不敢
不奏勅旨宜付飛龍使依舊支置

元和十二年十月勅閑廐使所理岐陽馬舊地方三百
四十七頃據監察御史范傳式奏岐陽馬坊地既不妨
百姓租佃又不闕官中賦稅宜據數交付閑廐使收管
開元中以國馬尚多自長安至隴右置七馬坊為計會
所都領岐下岐隴間善水草及膏腴田皆屬七馬坊至
德已後監牧使與七馬坊名額盡廢其地利因歸於閑

廐使寶應中鳳翔節度請監牧廢田給貧人及軍吏已上者相承數十年矣又別有勅賜諸寺觀凡千餘頃至是閑廐使張茂宗恃藩邸之舊舉故事盡收之

太和九年十一月閑廐宮苑等使奏京兆府合供當使諸門中當三衛八十人准舊例京兆府取諸縣百姓供前件三衛充門仗諸雜役每月交替者伏以百姓往來費損至多非惟煩與追呼實亦難虞寇盜伏請從今年十二月起首停供臣於當司召至子弟一百人每人每

月使於當司方圓與糧六斗亦不要府縣資陪取其情願永絕擾人伏乞允臣管見勅旨依奏

開成四年正月閑廐宮苑使柳正元奏當使東都留後知院官鄭鑑每月院司給料錢三十四貫文兼請本官房州司馬料錢今請於使計所給料錢數尅減十千添給所由二十人糧課巡官二人請勒全停郢州舊因御馬配給苜蓿丁三十人每月納資錢二貫文都計七百七百九十二貫文其州司先以百姓凋殘闕本額量選

三百九十六貫文今請全放當管修武為坊田地去太和二年河陽節度使楊元卿奏請權借耕佃充給閑用今緣安利一軍伏請永配主管伏以當司應屬東都宮苑閑廐事務管係舊額名數尚多苟存影占之門是啓非道之路但係務繁地遠訪察尤難况推禁罪人動經旬月因緣流滯移牒用情事務委留守主管曹司煩職官吏冗名俾無尸素之員又去申報之滯其東都院每年合送宮苑使加給錢一百二十千文亦請停送當司

方員羨餘自備課料伏乞聖慈允臣所奏勅旨正元條
陳利病實謂推公所請割屬留守及停廢職員並收糧
並宜依其新差知院鄭鑑亦是冗員宜勒赴任仍委留
守於見在職事人中差補勾當郢州每年送苜蓿丁資
錢並請全放實于疲甿有濟其修武馬坊田地河陽節
度近年權借依前勒閑廐宮苑使勘存借名收管

內侍省

龍朔二年改為內侍監咸亨元年改為內侍省光宅元

年改為司宮臺神龍元年復為內侍省天寶十三年十一月二十八日置內侍監二員三品貞元四年二月四日內侍省內給事加二員謁者監加四員內侍伯加置四員

內坊 開元二十七年四月二十八日勅義方之訓固在親承太子既絕外朝中官自通禁省有何殊異別立主司其內坊宜復內侍省為局

護軍中尉 貞元十二年六月六日置以監司當左右

神策軍實文塲霍仙鳴為之

中護軍 同前日月置以監右神威軍張常進焦希望為之

監軍 自垂拱三年十二月停御史監軍事在御史臺卷神龍元年以後始用中官為之

唐制內侍省其官員內侍四人內常侍六人內謁者監六人內給事十八人謁者十二人典引十八人內寺伯二人寺人六人別有五局掖廷局掌宮人簿籍宮闈局

掌內官門禁其屬有掌扇給使等員奚官局掌宮人疾
病死喪內僕局掌宮中輿輦導從內府局掌宮中供帳燈
燭五局有令丞皆內官為之貞觀中太宗定制內侍省不
置三品官內侍是長官階四品其職但在閣門守禦黃
衣廩食而已則天稱制二十年差增員數神龍中宮官
三千人超授七品官以上員外官者千餘人玄宗朝中
官稍稍稱旨者即授三品左右監門將軍得門施戟及
李輔國從幸靈武程元振翼衛代宗遂至守三公封王

爵于預國政郭子儀止伐遂立觀軍容宣慰使命魚朝
恩為之然自有統帥亦監領而已貞元之後天子爪牙
之士悉命統之於是畜養假子傳襲爵土跋扈之兆萌
于茲矣而中外黨錮恣為不法雖朝廷之令漸不能制
文宗即位以仇士良等威福在已思將除之卒有李訓
之敗公卿輔相赤族受禍暨武宣之際闔人輩嘗切齒
于南衙官屬光化中昭宗方授政柄於宰相崔胤尤忌
宦官于是左右軍容使劉季述王仲先深不自安幽帝

于東內冊皇太子裕監國崔胤乃外協朱氏密圖匡復
潛構護駕監州雄毅軍使孫德昭誅季述等昭宗返政
改元天復至三年大懲其弊收中官第五可範已下七
百餘人于內侍省同日誅之諸道監軍使亦令勦戮炎
炎之勢因斯息矣

貞觀十四年司門員外郎韋元方不過所給使見左右
僕射而去給使奏之上大怒出元方為華陰令特進魏
徵言曰帝王之怒動若雷霆何可妄發為前給使一言

夜出勅書事似軍機外人誰不驚駭但宦省之徒古來難近輕為言語易生患害遽行黜陟深非事宜漸不可長所宜深慎上納之遂停貶黜

萬歲登封元年二月十九日勅諸道逆人給使配役送內侍省者不得于州縣附貫亦不得共中官給使結義往來

景龍元年酸棗縣袁楚客奏記于中書令魏元忠曰內豎者給宮掖之事供掃除之役上古皆備此職但以僕

隸畜之豈及於官次中古以來大道乖喪不重賢哲惟
親近習或委之以軍或授之以權遂使豎刁亂齊伊戾
敗宋君側之人衆所畏懼葛洪所謂鷹頭之蠅廟垣之
鼠無拳無勇職為亂階者也洎乎後漢用事尤甚時君
既不知其失大臣又畏罪不言是以害及生靈毒流天
下洎于晚節竟亂中朝各相朋黨屠害良善當此時也忠
臣義士覩斯慷慨不得不權行殺戮至以無鬚而橫死
者不可勝言豈非結廬之深自危之速易曰小人用壯

斯之謂也自大君受命中興成務獨有闕豎坐升班秩
既無正闕多授員外舉其全數向滿千人苟綰青紫蠶
食府藏既非致理之道誠謂長亂之階此則朝廷之失
君侯不正誰正之哉

景雲二年四月二日勅內侍省令史資勞宜同殿中省
令史其五局令史同殿中省諸局開元三年四月二十
二日勅內侍省內坊單身給使有品無品並免其准戶
例差科五年七月二十二日勅內侍省內坊給使遭憂

者准百日滿勅上七年十一月二十三日勅內侍省將軍中郎內侍內給事五品已上官宜准宿衛官例給與酒料十四年八月二十四日勅內侍省品官遭憂宜待終服還官勅上如有灼然要籍者臨時奏

寶應元年五月十九日勅諸道州府所承上命須憑正勅然後施行不得懸信中使宣言勅即便遵行又開元七年二月十三日勅內侍省五品已上許養一子仍以同姓者初養日不得過十歲

正元十五年四月詔內侍省內給事加置二員又內侍省所奏應管高品官白身共四千六百一十八人數內一千六百九十六人高品諸司使并內養諸司判官等餘並單貧無屋室須稍優恤宜各加衣糧半分度支據數支給

謹按圖史天寶末品官黃衣以上三千餘人下文已云盛矣今則又踰其數焉

二十年十二月詔加掖廷局令四員

寶歷二年十一月詔朝官及方鎮之家不得私置白身太和四年八月內侍省奏當省官員從掖廷局令以下

至監作並居本品之下或注擬難於區別伏乞請重下有司詳定勅旨宜付所司詳定聞奏大中三年九月勅楊施禮縱氏縣莊宜賜東都內侍省新配恭陵守當貧窮官正居住

貞元十一年正月初鑄河東監軍印監軍有印自茲始也

天復三年二月勅諸道監軍使副監判官並停其院印當日差人賁納禮部銷毀

太常寺

龍朔二年改為奉常正卿咸亨元年復舊光宅元年改為司禮寺神龍元年復為太常卿

少卿 自神龍元年七月三十日加一員徐彥伯為之
衣冠署 貞觀元年省

太廟署 登封元年正月改為清廟臺神龍元年復為
太廟署開元二十四年四月四日廢以太常寺奉宗廟
太公廟署 神龍二年始分兩京置

博士 初本四員開元二十七年省一員乾元元年二月十五日卿韋陟奏請依舊四員一人分京留守

丞 皇朝因隋舊制置丞二人

大祝 初本每室一人共六人開元十年七月二日加至九員二十七年減六員留三員

奉禮 初本名治禮貞觀二十三年七月二十七日改為奉禮本四員減兩員

貞元十二年四月勅每薦新于太廟令太常卿及少卿

一人行事

景雲二年十一月十二日勅太常寺所須梁盛今總計料定每年所司差綱一人典二人一時部送不得更有零疊亦不得輒差使催

開元八年四月一日勅諸陵主衣主輦主藥每色各八員分為四番季上其考第仍隸太常寺其陵直若更有執掌亦於此三色內通融驅使

乾元元年七月二十八日太常寺先置禮直五人宜並

停廢

建中元年正月五日大理法官太常博士委吏部擇方
與本司同商量注擬貞元七年正月二十六日復置禮
儀直兩員禮院直兩員並停禮院修撰官一人檢討官
一人孔目官一人院典三人

八年四月太常寺奏本置禮生是資贊相東都既無祠
祭不合虛備闕員且無功勞妄計考課年滿之日一例
授官比來因循實長徼幸其東都太廟及郊社齋郎先

並准勅停訖惟禮生尚在伏請下吏部自今以後不得更有注擬其先補者並請追赴上都已滿者伏望量留四年未滿者請折聽或八考如有情涉規避委託事由兩月內不赴兩都即請牒吏部注申解退收實本色冀循事實永絕姦源勅旨依奏

九年四月勅自今以後太常寺宜署禮院修撰檢討官各一員便為定額

十九年勅太常博士其位雖卑所任頗重至于選擇不

易得人郊祀禮儀朝廷典法舉措取則職事實繁所請俸料宜准六品已下常參官例處分元和六年閏十二月以皇太子薨勅國子司業裴蒞權攝太常博士西內勾當蒞通習古今禮儀嘗為太常博士及官至郎中每兼其職至改國子司業方罷兼領久居禮官頗詳國典舊無太子薨禮故又命蒞領之其廢朝十三日蓋用期服易月之制也

十年正月贈故太常卿崔邠吏部尚書初邠為太常卿

初上大閱四部樂于太樂署觀者咸縱觀焉自私第去帽親導母輦公卿逢者為迴騎避之衢路以為榮

長慶二年閏十月太常寺奏兩院禮生元額三十五人請准元和十二年勅置守闕人即免散闕勅旨依奏

四年七月勅吏部所注太常寺伎術官直殿中既准格未為乖越宜並待考滿日停太常寺所論員闕從來年以後並任本寺收管諸司更不得占授

大中四年七月御史臺奏司農寺文案少卿不通判有

再彙典勅旨自今已後九寺三監少列宜與大卿通判
文案

九年八月太常卿高鉅決罰禮院禮生博士李慤引故
事見執政以禮院雖係太常寺從來博士自專無闕白
者太常三卿始蒞事博士無參集之禮今之決罰有違
故典

時宰相以鉅舊德不能詰責鉅慙而請退

十二年十月太常卿封敖左授國子祭酒舊式太常卿
上事庭設九部樂時敖拜命後欲便于觀閱移就私第

視事為御史所舉遂有此責

光祿寺

龍朔元年改為司宰寺卿為正卿咸亨元年復名光祿寺光宅元年改為司膳寺

少卿 初本一員景龍二年十一月四日加一員以劉正為之

珍羞署 初本為肴藏署垂拱元年二月二日改

景雲二年正月勅左右廂南衙廊中食每日常參官職

事五品以上及員外郎供一百盤羊三口餘賜中書門下供奉官及監察御史太常博士百官六參日節日加羊一口冬月量造湯餅及黍臠夏月冷淘粉粥棗栗荔枝桃梨榴柑柿等擇不堪供進者亦供衙前食若御內坐當參日即於外廊設食并給門下中書有餘賜供奉官六品以下及在仗三衛立帥漏生漏刻直官等食不須迴折就東宮衛前食並准此仍每坐日職事五品已上賜食供十盤六參日供四十五盤有餘賜左右春坊

供奉官詹事直若非坐日設三盤有餘日應設食者准料即造不須奏聞其斷屠日各于衙內設兩口羊食其六品已下於光祿食者每正冬寒食三節皆給餅內作節食三月十八日勅每御承天門樓朝官應合食藩鎮各辭見並合光祿准舊例於朝堂廊下賜食其朝官食迴衙內食充

開成四年正月光祿寺奏當用伏准大歷八年四月十八日勅令主辦百寮廊下賜食仍委御史臺勾當至于

補置所由計料費用即是當司本事自從臺司自置都
一人管計今造膳支辦盡非有司闕敗罪歸當寺比於
臺司論請因循竟未却還今御史中丞丁居晦深知前
弊悉還所職其廊下食料錢勅今見於臺司交割次又
御史臺奏伏准大歷八年元勅仍委御史臺勾當本慮
事有闕違自後因循遂成侵占人吏雖隸光祿寺補置
多出臺司謹詳勅旨根尋須申歸有司方可求理已牒
光祿寺自部置若有闕失責在本司仍依前差御史一

人充使勾當奏訖可

衛尉寺

龍朔元年改為司衛寺卿為正卿咸亨元年復舊光宅
元年改為司衛寺神龍元年復舊為衛尉寺

少卿 初本一員景雲二年十一月四日加一員以傳
忠孝為之

武庫署 開元中分兩京置

武器署 貞觀年分中分東都置

開元二十七年十一月武庫置應諸衛行從及冬正等
甲仗袍襖旛旗幕等衛府卿李昇奏上件物每年行幸
溫湯及冬正陳設兩京來往諸衛將軍事畢後多有污
損退限不納又比年因溫湯行幸所由便奏勒留充冬
至及元日隊仗用以此淹久便長姦源兼恐迴換望自
今以後每事了限五日內送納武庫如有違限所由長
官及本官望請科違勅罪其量與決杖仍不在奏免之
限勅旨依奏

天寶八載十一月勅衛尉幔幕氊褥等所由多借人非理損污因循日久為弊頗深爰及幕士私將驅使并廣配充廳子馬子並放取資近今推問事皆非繆今後其幔幕氊褥等輒將一事借人並同盜三庫物料罪並使幕士與人張設及自驅使擅收放資計受贓數以枉法論其借人及借與人等六品已下非請資官決放餘聽進止仍委左右巡使常加糾察

十一年十二月勅幕士供膳掌閑取浮逃無籍人充勅

旨幕士供膳掌閑並雜匠等比來此色緣免征行高戶
多下例皆情願自今已後有關各令所由先取浮逃及
無籍實堪驅使人充使與編附仍委御史中丞都充勾
當廣德一年二月二十一日赦文京兆諸司使幕士丁
匠總八萬四千五百人數內宜每月支二千九百四十
四人仍令河東關內諸州府擬戶口分配不得編出京
兆餘八萬一千一百一十四人一切並停其年衛尉寺
奏當寺管幕士總八百六十九人七百八十九人停八

十人依舊定四十人長上幕士本司招補不差百姓並請依舊定四十人減外請留其幕士申請停差每人每月官別給錢三千五百文付本司通勘處置共據計一年當一千六百八十貫文彊騎先支五人本司既有幕士充勾當彊騎請停勅旨依奏

宗正寺

龍朔元年別為司宗寺卿為宗正卿咸亨中改為宗正寺光宅年為司屬寺天寶七年五月十一日升同太常

寺少卿及丞准此

少卿 初本一員景雲二年十一月四日加一員以姜晞為之

丞 自開元二十五年二月八日加一員

崇玄署 自開元三十五年二月二日宗正卿魯王道監奏今年正月七日勅道士女冠並隸宗正等其崇玄署今既鴻臚不管其署請屬宗正寺勅旨依天寶二年三月十二日道士女冠宜令司封檢討不須更隸宗正

寺其崇玄署並停

舊例以太皇太后皇后之親分為五等皆定于司封宗
正受而統焉若皇周親皇后父母為第一等准三品皇
大功親皇小功親尊屬太皇太后皇后太后皇后周親為
第二等准四品皇小功親皇總麻尊屬太皇太后皇后太
后皇后大功親為第三等准五品皇總麻親為第四等
皇袒免親太皇太后小功卑屬皇太后皇后總麻親及
舅母姨夫為第五等並准六品其籍如州縣之法

武德元年十月二十四日詔太僕少卿安康公襲譽我
之同姓派別支分惟厥祖考世敦恭睦特聽合譜宗正
恩禮之差同諸服屬

其年十二月六日義安郡王李孝常賜屬籍宗正寺二
年二月十六日詔宗緒之情義超常品宜其旌異以明
等級天下諸宗姓任宗者宜在同列之上無職任者不
在徭役之限每州置宗師一人以相統攝

其年十二月十四日幽州總管燕都王羅藝賜姓李氏

屬籍宗正寺 其年十月三日曹國公徐世勣賜姓李氏屬籍宗正寺

三年六月一日楚王杜伏威賜姓李氏進封吳王屬籍宗正寺

九月十九日蔚州總管高開道賜姓李氏屬籍宗正寺
四年正月十四日竇建德行臺尚書令胡大恩以安鎮來降賜姓李氏屬籍宗正寺

永徽二年九月二十一日召宗正卿李博又問曰比聞

諸親何得有除屬者對曰以屬踈降盡故除總三百餘人上曰追遠之感實切于懷諸親服屬雖踈理不可降並宜依舊編入屬籍

開元十三年四月詔嗣王有傍繼者並宜總停

二十年七月七日宗正寺官員悉以宗子為之

三十五年七月勅其宗正卿丞及主簿擇宗室中才行者補授

天寶元年七月二十三日詔殿中侍御史李彥允等奏

稱與朕同源承涼武昭王俊請甄叙者自今以後涼武王王子寶已下絳郡姑臧燉煌武陽等四公子孫並宜隸入宗正寺編入屬籍

五載一月十三日勅九廟子孫宜並升入五等親永為常式

天寶五載至建中元年正月五日赦文入廟子孫非五等親任用如始封王蔭不限年代補齋郎三衛至簡選日量文武稍優與處分其載十一月宗正寺奏錄事先

有一員請更置一員從之

七載五月二十九日宗正卿褒信王璆奏皇妹及女准禮出嫁後容降本親一等今後並降為第三等臣以為執禮破親有虧常典依請一切依服屬等第為定不在降服限仍望永為常式勅旨依

大曆十三年正月淄青節度使李正已請附入屬籍勅旨從之

貞元八年太常寺奏乃者宗子名銜皆云皇某親行於

文疏曹署此非避嫌自卑之道也謹按儀禮曰諸侯之子稱公子公子不得稱先君公子之子稱公孫公孫不得稱諸侯此自卑別尊者也又禮記曰君有合族之道族人不得以其戚戚君位也鄭玄注云皆臣也不得以父兄子弟之親戚于君位謂齒列也所以尊君別嫌今宗子若以皇字為稱首從數為序親誠非別卑于尊不戚君位之意又按儀禮從父昆弟則今三從也聖朝方崇敦叙宜辨等戚其三從內伏請仍舊其餘各以祖禰

本封某為某王公子孫則親踈有倫名禮歸正從之

元和四年四月詔故奉天定難功臣太尉兼中書令西

平郡王李晟宜編入屬籍又成德軍節度使張寶臣依

舊賜姓李列于屬

寶臣本名忠志初事安祿山後事史思明寶應初史朝義敗寶臣開城門

以納王師因授成德軍節度使故有是賜

七年十二月宗正寺奏當司圖譜官一人准元勅官滿

宜減兩選其孔目官比類請一槩例處勅旨宜依奏

十一年六月宗正寺奏當司府史元額一十六員內八

員先停減更請二人通前十員從之

長慶元年三月宗正寺奏貞元二十一年勅宗子陪從放五百七十人出身今年勅放三百人伏緣人數至多不需恩澤白身之輩將老村間乞降特恩更放二百人出身許之

開成二年六月修玉牒官屯田郎中李衢等奏竊以聖唐玉牒與史冊並驅立號建名期于不朽伏乞付宰臣商量於玉牒之上特創嘉名以光帝籍勅旨宜以皇唐

玉牒為名

太宗三年正月宗正卿李玘奏宗子諸親齋郎室長選人准格每年遣諸陵廟丞等充保識官今請選人自于諸司求覓清資及見任宗子京官充保識以憑給解伏乞編入吏部選格以為久例勅旨依奏

六年正月中書門下奏宗子每進文疏及舉選文狀例皆稱皇從高叔祖叔曾祖既是人臣頗乖禮敬臣等延英已具陳奏伏請令自今已後應宗子文狀並令具姓

氏不得更言皇從但令名方姓名下稱某王房即便可
以辨別勅旨依奏

咸通九年勅沙陀首朱邪赤心賜姓李氏名國昌籍係
鄭王房以討平徐州叛卒龐勛功也

唐會要卷六十五

欽定四庫全書

唐會要卷六十六

宋 王溥 撰

太僕寺

龍朔元年改為司馭寺卿為正卿咸亨中復為太僕寺
光宅中改為司僕寺神龍元年復為太僕寺

少卿 自景雲元年八月加一員韓思復為之

丞 自大足元年三月六日加一員

開成三年卿趙蕃奏請差少卿一人用隨年鐵印印見在牛羊堪祠祭及鳴牛並不印勅旨從之

羣牧使

貞觀十五年尚乘奉御張萬歲除太僕少卿勾當羣牧不入官銜至麟德元年十二月免官三年正月太僕少卿鮮于匡裕檢校隴右牧監雖入衛未置使上元五年四月右衛中郎將丘義除檢校隴右羣牧監儀鳳三年十月太僕少卿李思文檢校隴右諸牧監使自茲始有

使號其後蘇幹夏侯亮陽道昕張仁德張思廉宗玄爽
周屨永魏文忠李道廣賀蘭爽姚元之宗楚客平王隆
基宋王成器王皎王毛仲牛仙客席楚珍薄承姚韋衢
章仇兼瓊王鉷安祿山王鳳翽董唐欽呂崇賁李輔國
彭禮盈藥子昂相次為之暨至德後西戎陷隴右國馬
盡沒監牧使與七馬坊名額皆廢今又有樓煩監牧使
龍陂監牧使等

開元三年四月八日勅諸道牧監官有闕交要者委本

使簡擇明開牧養者奏付選司勘責補擬如非其材所
由科貶經負犯者不在奏補之限牧尉有闕亦委使司
差補申牒所由有不足並申省司速訪補擬

天寶十二載十一月二十五日勅兩京去城五百里內
不得置私牧地如有一切官牧

貞元十二年福建觀察使柳冕奏置萬安監牧於泉州
界悉索部囚馬五千七百匹并驢牛三千口以為監牧
之資人情大擾經年無所聲息詔罷之元和十一年正

月樓煩監牧使中官黨文楚以供征馬羸瘠為諸軍所奏奪緋沒其家財配隸南衙

十四年五月於襄州穀城縣置臨漢監牧兼之

至太和二年十一月廢其年八月於襄州穀城縣置臨漢監牧以牧馬仍令山南東道節度使兼充監牧使至太和七年正月山南東道節度使裴度奏先置牧養馬三千三百匹廢百姓田四百餘頃詔許定停之

太和七年十一月度支鹽鐵等使奏以銀州是牧放之

欽定四庫全書

唐會要
卷六十六

三

地水草甚豐國家自艱虞以來制置都闕每西戎東牧
于此置頓致外蕃寢驕邊備不立臣得銀州刺史劉
源狀計料於河西道側近市孳生堪牧養馬每匹上不
過絹二十疋下至十五疋臣已於鹽鐵司方圓收拾美
餘絹除正進外排比得五萬疋約得三千餘疋今於銀
州置銀州監使委劉源充使勾當冀得三數年外蕃息
必多勅旨劉源宜兼充銀州監牧餘委度支使條流訖
聞奏

開成二年七月夏綏銀宥等州節度使劉源奏伏准大
和七年十一月勅委臣於銀州監置監城一所收管羣
牧自立務以後今計蕃息孳生草父馬約七千餘匹若
雨澤及時水草豐茂即並於當監四遠牧放或遇天時
亢陽水草枯竭即湏散將監馬直至綏州界內以來就
遠水草伏以所管官馬其數益多出於遠界須有憑倚
今訪擇得綏州南界有空地周迴二百餘里堪置馬務
四面懸險賊路不通縱有突過剽掠臨時度其要害只

著三五十人防捍即可固守其地是臣當管界內空地
並非百姓見佃田疇今請割隸永屬監司伏乞聖慈允
臣所奏勅旨宜委本道人差人與本州刺史勘驗如實
無主便任監司收管

大理寺

龍朔中改為詳刑寺卿為正卿咸亨中復為大理寺光

宅元年改為司刑寺至神龍元年復為大理寺
少卿自本一員永徽六年八月十二日加一員以僕

善業為之

正 自龍朔年改為詳刑大夫咸亨年復舊

丞 初本八員天冊三年十月二十八日省兩員

司直 自武德初因隋舊制置六員

評事 自貞觀二十二年十二月九日置十員掌出使
推事

貞觀元年二月二十八日上謂封德彝曰大理之職人命所懸此官極須妙選公宜陳其堪者德彝未對上曰

戴胄忠正清直每事用心即其人也於是除大理少卿
咸亨三年十月張文瓘兼大理卿旬日決疑事四百餘
莫不允當皆無怨言文瓘嘗有疾繫囚相與設齋願其
視事上元二年改侍中大理諸囚一時慟哭

開元八年勅内外官犯贓賄及私罪枉法為人所控及
赴闕陳訴合雪及減罪者並令大理審詳犯狀申刑部
詳覆如實寃濫仍錄名送中書門下其有遠年斷雪近
請除名亦准此其餘具刑部格

二十一年七月大理卿袁仁敬暴卒繫囚聞之皆慟哭
悲歌曰天不恤冤人兮何奪我慈親兮有理無由申兮
痛哉要訴陳兮

天寶九年三月十三日勅大理評事今後子弟及至親
中有未歷畿縣者不得注授

建中元年正月勅大理評事司直授訖三日內於四方
館上表讓一人以自代貞元四年十月大理卿于頔奏
諸處推事不盡須重勘覆或有誣告等每失程期稽滯

欽定四庫全書

唐會要
卷六十六

六

既多冤濫難息諸司及諸館驛多以大理為閒司文牒
遞報頗至稽失望今後各令別置文厯切約所由稍涉
稽遲許本寺差官累路勘覆如所稽違處州縣本判官
請書下考諸司使本推官奪一季俸料勅旨依奏

元和四年九月勅刑部大理覆斷繫囚過為淹滯是長
奸倖自今以後大理寺檢斷不得過二十日刑部覆下
不得過十日如刑部覆有異同寺司重申不得過十五
日省司重覆不得過七日如有牒外州府看勘節目及

於京城內勘本推即以報牒到後計日數被勘司却報不得過五日仍令刑部大理寺具初授文牒月日及有牒勘者具遣牒及報牒到月日牒報都省及牒分察使各准勅文勾舉糾訪如有違越奏聽進止其有獄情所疑宜再三詳審非限內可畢者即別狀分析寺司每月具已斷未斷囚姓名事日聞奏並申報中書門下五年二月大理寺奏當寺獄丞四員准六典合分直守獄承前雖俸料寡薄當寺自有諸色錢物優賞免至虛貧十

年以來曹司貧迫無肯任者遂令獄務至重檢校絕官
今伏請省兩員置兩員取所省員料錢併以優給見置
者庶令吏曹可注職事得人勅旨依奏

十五年六月大理寺奏當司府史許七考入流旨依奏
其年六月勅減大理評事兩員以增六丞之俸

太和元年十月大理寺奏准吏部起請當司府史二十
員減下三員又勒轉選請准勅附申及不減員勅旨依
奏

開成四年二月刑部奏大理司直張堯年在寺宿直以婢自隨合判官一任當徒一年從之

其年十一月勅節文刑法之官人命所繫頃有詔旨令擇才能每當朔望須備顧問宜令中書門下更加選擇會昌元年六月大理寺奏當寺司直評事應准勅差出使請廢印三面比緣無出使印每經州縣及到推院要發文牒追攝等皆是自將白牒取州縣印用因茲事狀多使先知為弊頗深久未釐革臣今將請前件廢印收

牒在寺庫如有出使官便令賫去庶免刑獄漏泄州縣煩勞勅旨依奏仍付所司

其年十一月又奏請創置當寺出使印四面臣于六月二十八日伏緣當寺未有出使印每准勅差官推事皆用州縣印恐刑部漏泄遂陳奏權請廢印三面伏以廢印經用年多字皆剝缺臣再與當司官吏等商量既為久制猶未得宜伏請准御史臺例置前件出使印其廢印却送禮部勅旨宜量置出使印三面

二年十月中書門下奏大理寺法官伏見衛覬稱刑法者國家之所貴重而私議之所輕賤獄吏者百姓之所懸命而選任之所卑下王政之弊未必不由此也臣等商量望委中書門下精擇法官選任不得在文學官之後如有缺員兼委大理卿自舉所知舉不得人顯加殿罰向後御史臺取御史數至三人以上即須取法官一人所冀刑法之官皆知勸勵勅旨從之

大中三年三月大理寺奏當寺司直評事從前不循公

理到官便求分司迴避出使致令官職失守勞逸不均
伏請從今以後待次充使後即往分司如未出使不在
分司限勅旨依奏

四年七月大理寺卿劉濛奏准文明元年四月勅律令
格式為政之先有類準繩不可乖越如聞内外官寮多
不習律退食之暇各宜尋覽仍以當司格式書於廳之
壁俯仰觀瞻免使遺忘今以年代遐曠屋壁改移文字
不脩瞻仰無所就中大理寺評斷之司尤為要切臣已

於本寺廳粉壁重寫今式格後勅旨尚書省郎官亦委都省檢勘依舊抄撮要即寫於廳壁其年十月大理少卿崔杞奏當寺官人今後在寺詳斷或出使推案有犯贓私者請於常式加罪一等餘犯即准舊式從之

鴻臚寺

龍朔中改為司賓寺卿為正卿咸亨元年復為鴻臚寺光宅中改為司賓寺神龍元年復為鴻臚寺

少卿 初本一員景雲二年十一月四日加一員以劉

興為之

開元十九年十二月十三日勅鴻臚當司官吏以下各施門籍出入其譯語掌客出入客館者於長官下狀牒館門然後與監門相兼出入

天寶八載三月二十七日勅九姓堅昆諸蕃客等因使入朝身死者自今後使給一百貫充葬副使及妻數內減三十貫其墓地州縣與買官給價直其墳墓所由營造

十三年二月二十七日禮賓院自今後宜令鴻臚勾當
檢校應緣供擬一物已上並令鴻臚

大歷四年七月詔罷給客省之廩每歲一萬三千斛永
泰已後益多事四方奏討或連歲不遣仍於右銀臺門
置客省以居之上書言事者常百餘人蕃戎將吏又數
十百人其費甚矣至是皆罷

建中元年七月以鴻臚寺左右威遠營隸金吾

元和九年六月置禮賓院於長興里之北

司農寺

龍朔二年改為司稼寺咸亨元年改為司農寺

少卿 武德之初四員貞觀二年減兩員

木炭使

天寶五年九月侍御史楊釗充木炭使永泰元年閏十月京兆尹黎幹充木炭使自後京兆尹常帶使至大厯五年停貞元十一年八月戶部侍郎裴延齡充京西木炭使採造使十二年九月停

景雲二年六月十三日勅中書門下御史臺尚書省造食戶衣糧令司農每季給付

天寶元年六月司農少卿王翼奏應諸司諸祿望准開元二十八年十月十五日勅並令孟月三旬內給了仍望預分請日每司一時分付訖其厯便封送當寺若逢陰雨倉司灼然事故未得給者當日牒上所由待給諸司畢後准前勘會分付勅旨依奏

天寶五載三月勅司農錢穀是司其官人等並不在差

使限

乾元元年十月司農寺奏舊規名額仍為中署特望升入上署勅旨依奏

七年十月司農卿李模有罪免官初司農當供三宮各菜二千車以度支給車直稍賤又陰雨不時菜多傷敗模以度支為辭上責不先聞奏故免之於是模奏司農菜不足請京北市之京兆尹薛珏萬年令韋彤禁有菜者私賣上令奪珏俸一月彤俸三箇月

元和三年八月司農少卿崔鄭奏停倉一員監事二員從之

太和七年八月九日勅司農寺每年供宮內及諸廚各藏菜並委本寺自供其菜價委京兆府約每年時價支更不得配京兆府和市大倉出給納

貞元五年司農少卿李堅立太倉石柱記云貞元五年四海文明天子唯穀是恤思富國使人之事莫若端本以尊農事故廩庾困倉尤切聖慮俾少卿一人專領其

署蓋欲難其任而重其事也

太府寺

龍朔二年改為外府寺卿為正卿咸亨元年復為太府寺光宅中改為司府寺神龍元年復為太府寺

少卿 自武德初置二人貞觀元年省兩員龍朔二年正月十五日加一員以韋思齊為之太極元年十二月十八日又加一員分為兩京檢校以崔諤為之

丞 自武德初五員貞觀元年省一員

常平署 自顯慶三年十月三日置

武德八年九月勅諸州斗稱經太府較之

開元九年勅格權衡度量并函脚雜令諸度以北方秬
黍中者一黍之廣為分十分為寸十寸為尺二寸為大
尺諸量以秬黍中者容一千二百粒為籥十籥為合十
合為升十升為斗三斗為大斗十升為斛諸權衡以秬
黍中者百黍之重為銖二十四銖為兩三兩為大兩十
六兩為斤諸積秬黍為度量權衡者調鐘律測晷景合

湯藥及冕服制用之外官私悉用大者京諸司及諸州各給秤尺及五尺度斗升合等樣皆銅為之關市令諸官私斗尺稱度每年八月諸金部本府寺平較不在京者詣所在州縣平較並即署然後聽用

十二年九月二十五日勅左右藏官典職在出納不得判攝外事及帖諸司

天寶九載二月十四日勅自今以後麵皆以三斤四兩為斗鹽並勒斗量其車軸長七尺二寸除陌錢每貫二

十文餘麪等同

大歷十年三月二十二日勅自今以後應付行用斗秤
尺度准式取太府寺較印然後行用至十一年十月十
八日太府少卿韋光輔奏稱今以上黨羊頭山黍依漢
書律歷志較兩市時用斗每斗小較八合三勺有餘今
所用稱每斤小較一兩八銖每銖六黍今請改造銅斗
斛尺秤等行用制曰可至十二年二月二十九日勅公
私所用舊斗秤行用已久宜依舊其新較斗秤宜停

太和五年八月太府奏斗稱舊印本是真書近日已來假偽轉甚今諸省寺各撰新印改篆文勅旨依奏

六年四月勅金部所奏條流諸州府斗秤等諸州皆有太府寺先頒下銅升斗及秤見在每年較勘合守成規今若忽重條流又須別有徵歛無益於事徒為擾人宜並仍舊但令所在長吏切加點檢不得致有差殊

少府監

武德初以兵革未定置軍器監廢少府監貞觀元年正

月分太府中尚方左尚方右尚方織染方掌治方五署
置少府監通將作國子為三監龍朔二年改為內府監
咸亨二年復為少府監光宅年改為尚方監神龍元年
復為少府監其官名隨監名改復也

少監 本一員太極元年二月十八日加一員以孔仲
思為之至開元十一年罷軍器監隸入少府監為中弩
坊更置少監一員統之以馮紹正為之十四年八月二
十八日省一員

中尚省 初本中尚方天后時去方字避監號開元已
來別置中上使以檢校進奉雜作多以少府監及諸司
高品為之

永徽六年十一月詔曰少府監非軍國所須宗廟之用
並不須飾以珠玉

顯慶六年二月十六日勅南中省諸國舶宜令所司每
年四月以前預支應須市物委本道長史舶到十日內
依數交付價值市了任百姓交易其官市物送少府監

簡擇進內

景龍二年四月十四日勅少府每季先出錢二千貫別庫貯每別勅索物庫內無者即令市進皆須對主付值不得且令供物於後還錢其錢兼以絹布絲綿充數其祠祭明衣及布亦用此物充

將作監

龍朔二年改為膳工監咸亨年復為將作監光宅年為營膳監神龍元年復為將作監

大監 初本為大匠龍朔年為大監咸亨年為大匠天寶十二年為大監依舊

少監 初本一員大足元年二月六日加一員以楊務廉為之

中校署 自開元二年置

天寶四載四月勅將作監所置且合取當司本色人充直者宜即簡擇發遣內作使典亦不得輒取外司人充其諸司非本色直及額外直者亦一切並停自今後更

不得補置如歲月深久尚或因人所由長官量事貶降其所應直決一頓配糴邊軍

建中元年九月將作監上言宣政內廊有摧壞者今當脩之准陰陽書謂是歲孟冬為魁剛不利脩作請卜他時上曰春秋之義啟塞從時若脩毀完敗何時之擇詭妄之書勿徵乃脩

國子監

武德初為國子學隸太常寺貞觀元年五月改為監龍

朔二年改為司成館咸亨元年復為國子監光宅元年改為成均監神龍元年復為國子監

東都國子監

龍朔二年正月十八日置學官學生分於兩教授

祭酒 自龍朔年改為大司成咸亨年復為祭酒光宅年改為成均祭酒神龍年復為祭酒貞觀中孔穎達為祭酒准故事上日開講五經題至天后朝諸武駙馬為祭酒乃判祥瑞案王道非舊典也

司業 自武德初省貞觀六年二月二日置一員龍朔
二年改為司成咸亨元年復為司業本一員太極元年
二月十八日加一員以蕭憲為之

國子博士 自龍朔中改為司成宣業咸亨中復舊
丞 自武德初因隋之舊置一員

長安四年四月四日勅國子監宜置侍講四人四考聽
選

大歷五年八月皇太子於國學行齒胄之禮國子司業

歸崇敬以國學及官名不稱請改之上疏曰禮記王制曰天子學曰辟雍又五經通義云辟雍養老教學之所也以形制言之雍壅也辟壁也壅水環之園如壁形以義理言之辟明也雍和也言以禮樂明和天下禮記亦謂之澤宮射義云天子將祭必先習射於澤宮故前代文士亦呼為璧池亦曰璧沼亦謂之學省後漢光武立明堂辟雍靈臺謂之三雍至明帝躬行養老于其中晉武帝亦作明堂辟雍行鄉飲酒之禮又別立國子學以

殊士庶永嘉南遷唯有國子學不立辟雍北齊立國子
寺隋初亦然至煬帝大業十三年改為國子監今國家
富有四海聲名文物之盛唯辟雍獨闕伏請改國子監
為辟雍省又以祭酒之職非學官所宜按周禮師氏掌
以媾詔王教國子請改祭酒為大師氏位正三品又司業者
義在禮記云樂正司業正長也言樂官之長司主此業
爾雅云大板謂之業按詩周頌設業設簋崇牙樹羽則
業是懸鐘磬之簠也今大學既不教樂於義則無所取

請改司業一為左師一為右師正四品上又以五經六籍古先哲王致理之式也國家創業取士之法立明經發微言于衆學釋回增美選賢與能自艱難以來取人額易考試不求於文藝及第先取於帖經遂使額門業廢請益無從師資禮虧傳授義絕今請以禮記左傳為大經周禮儀禮毛詩為中經尚書周易為小經各置博士一員其公羊穀梁文疏既少請共准一中經通置博士一員所擇博士兼通孝經論語依憑章疏講解分明注

引旁通問十得九兼德行純潔文辭雅正儀刑規範可
為師表者令四品已上各舉所知在外者給驛年七十
已上者備禮徵聘其國子四門太學三館各立五經博
士品秩上下生徒之數各有差其舊博士助教直講直
經及律館算館書館助教請皆罷省其教授之法學生
至監謁同業師其所贄脩一束清酒一壺衫布一段其
色隨師所服師出中門延入與坐割脩酌酒三爵而止
乃發篋出經摺衣前請師為依經辨理舉一隅然後就

室每朝晡二時居講堂說釋道義發明大體兼教以文
行忠信之道示以孝悌睦友之義旬省月試時考歲貢
以生徒及第多者為博士考課上下疏奏不從

元和元年正月勅自今以後國子祭酒司業及學官並
須取有德望學識人充四月國子祭酒馮伉奏應解學
生等國家崇儒本於勤學既居庠序宜在交脩其有藝
業不勤遊處非類樗蒲六博酗酒喧爭凌慢有司不脩
法度有一於此並請解退又有文章帖義不及格限頻

經五年不堪申送者亦請解退其禮部所補生到日亦請准格帖試然後給廚後每日一度試經一年等第不進者停廚廩以上功示其激勸又准格九年不及第者即出監間比來多改名却入起今以後如有此類請類送法司准式科處勅旨依奏

二年八月國子監奏准勅今月二十四日諸州府鄉貢明經進士見訖宜令就國子學官講論質定疑義仍令百寮觀禮者伏恐學官職位稍卑未足飾揚盛事伏請

欽定四庫全書

唐會要
卷六十六

十三

選擇常參官有儒學者三兩人與學官同為講說庶得聖朝大典輝映古今於是命兵部郎中蔣武考功員外郎劉伯芻著作郎李藩太常博士朱穎郊王府諮議張廷珪同赴國子監論講

其年十二月國子監奏兩京諸館學生總六百五十員請每館定額如後兩監學生總五百五十員國子館八十員太學七十員四門館三百員廣文館六十員律館二十員書館十員算館十員又奏伏見天寶以前國館

學生其數至多並有員額至永泰後西監置五百五十員東監近置一百員未定每館員額今謹具定額如後伏請下禮部准額補置勅旨依奏

其年十二月勅東都國子監量置學生一百員國子館十五員太學館十五員四門館五十員廣文館八員律館五員書館三員算館二員

十三年十一月祭酒鄭餘慶以太學荒墜日久生徒不振遂請率文官俸祿脩廣兩京國子監時論美之

十四年十二月鄭餘慶又奏京見任文官一品以下九品以上并外使兼京正員官每月所請料錢請每貫抽一十文以充國子監脩造文宣王廟及諸屋宇并脩理經營監中公廨雜用有餘添充本錢及諸色遂便宜處置勅旨依奏

長慶二年閏十月祭酒韋乾度奏當監四館學生每年有及第闕員其四方有請補學生人並不曾先於監司陳狀便自投名禮部計會補署監司因循日久官吏都

不稱舉但准禮部關牒收管有乖太學引進之路臣忝
守官請起今已後應四館有闕其每年請補學生者須
先經監司陳狀請替某人闕監司則先考試通畢然後
具姓名申禮部仍稱堪充學生如無監司解申請不在
收管之限舊例每給付廚房動多喧競請起今已後當
監進士明經等待禮部置闕畢牒到監司則重考試其
進士等若重試及格當日便給廚及房其明經等考試
及格後待經監司牒送則給廚房庶使息喧爭當監四

館學生有及第出監者便將本住房轉與親故其合得房學生則無房可給請起今已後學生有及第出監者仰館子先通狀納房待有新補學生公試畢後便給令居住當監承前並無專知館博士請起今已後每館衆定一人知館事如生徒無故喧競者仰館子與業長通狀領過知館博士則准監司條流處分其中事有過誤衆可容恕監司自議科決如有悖慢師長強暴鬪打請牒府縣銅身遞送鄉貫勅旨宜依

大和五年十二月國子祭酒裴通奏當司所授丞簿及諸館博士助教直講等謹按六典云丞掌判監事凡六學生每歲月業成上於監者以其業與司業祭酒試之明經帖經口試策經義進士帖中經試雜文策時務徵故事注云其試法皆依考功口試明經帖限通八以上明法算皆通九以上主簿掌印勾檢凡學生有不率師教者則舉而免之其頻三年下第九年在學無成者亦如之注云假如違程限及作樂雜戲者亦同惟彈琴習

射不禁諸博士助教皆分經教授學者每授一經講未
終不得改業諸博士助教皆計當年講授多少以為考
課等級應補當司諸學生等按學令云諸生先讀經文
通熟然後按文講義每旬放一日休假前一日博士考
試其試讀每千言內試一帖二三言講義者每二千言
內問大義一條總試三條通二為及第通一及不全通
者斟量決罰謹具當司官吏及學生令典條件如前伏
望勅下有司允臣所奏勅旨宜依

七年八月國子監起請准今月九日德音節文令監司
於諸道搜訪名儒置五經博士一人者伏以勸學專門
復古之制博採儒術以備國庠作事之初須有獎進伏
請五經博士秩比國子博士今左氏春秋禮記周易尚
書毛詩為五經若論語爾雅孝經等編簡既少不可特
立學官便請依舊附入中經勅旨依奏其年十二月勅
於國子監講堂兩廊創立石壁九經并孝經論語爾雅
共一百五十九卷字樣四十九卷

開成元年宰相兼國子祭酒鄭覃奏請置五經博士各一人緣無祿俸請依王府官例給祿粟從之

二年八月國子監奏得覆定石經字體官翰林待詔唐玄度狀伏准太和七年二月五日勅覆九經字體者今所詳覆多依司業張叅五經字為准其舊字樣歲月將久畫點參差傳寫相依漸致乖誤今並依字書與較勘同商較是非取其適中纂錄為新加九經字樣一卷請附於九經樣之末用證訛誤勅旨依奏

四年二月中書門下奏伏以朝廷興復古制置五經博士以獎顯門之學為訓胄之資必在得人不限官次今定為五品俸入四方有經術相當而秩卑身賤者不可以超授有官重而通詩達禮者不可以退資從今已後並請勅本色人中選擇據資除授令兼博士其見任博士且仍舊勅旨依

大中三年十一月國子祭酒馮審奏孔子廟堂碑是太宗皇帝建立睿宗皇帝書額備稱唐德具贊鴻猷文翰

欽定四庫全書

唐會要
卷六十六

二十七

顯然貞石斯在洎武后權政國號僭竊於篆額中間謬加大周兩字今豈可尚存偽號以紊清朝疑誤將來流傳僭謬其大周兩字伏望天恩許令琢去謹錄奏聞勅旨馮審所請刊正訛文頗協事體宜依

廣文館

天寶九年七月十三日置領國子監進士業者博士助教各一人品秩同太學以鄭虔為博士至今呼鄭虔為鄭廣文

書算學博士貞觀十三年十二月二十一日置隸國子學

律學博士顯慶元年十二月十九日尚書左僕射於志寧奏置令習李淳風等注釋五曹孫子等各部武經分為二十卷行用

顯慶三年九月四日詔以書算學業明經事唯小道各擅專門有乖故實並令省廢至龍朔二年五月十七日復置律學書算學官一員至三年二月十日以書學隸

蘭臺算學隸秘書局律學隸詳刑寺

軍器監

武德元年置貞觀六年三月十日廢併入少府監開元
三年十二月二十四日以軍器使為監領弩甲二坊十
年十一月二十五日罷隸入少府監為甲弩坊如少監
一員以統之天寶六年五月二十八日復置乾元元年
六月十三日又廢却置使其監已下並停

北京軍器庫

開元十一年五月五日置二十六年五月十八日廢依舊為甲坊

乾元元年六月勅軍器監改為軍器使大使一員副使二員判官二員其使以內官為之

貞元四年二月自武德東門築垣約在藏庫之北屬於官城東垣於是武庫遂廢其軍式器械隸於軍器使

都水監

武德年置隸將作監貞觀六年八月六日置監罷將作

監龍朔二年改為司津監咸亨元年復置垂拱元年二月改為水衡監神龍元年復為都水監

使者 自武德初為都水令貞觀八年改為使者龍朔年改為監咸亨年改為使者垂拱年改為都水府神龍年改為使者

諸津 其在京北河南府界者隸都水監外州者隸當界州縣

大歷六年十一月三日勅應祠祭乾魚宜令都水監依

樣每年起十月造掌隨祭供用其醢魚肉據用數依限送光祿寺令供造

宮苑監

武德九年七月十九日置洛陽宮監顯慶二年十二月十日廢洛陽總監改青城宮監為東都苑北面監明德宮監為東都苑南面監洛陽宮農圃監為東都苑東面監食貨監為東都苑西面監

天寶十年八月二十七日勅白獸日華叡武南辟伏等

門宜令宮苑通管捉

西京苑總監

永淳元年五月十日置東都監管諸園苑未置已前隸
司農寺

先天元年十月十日勅總監每年支雜物到其抄數於
本門進若宮內所須別索供訖每月終宜令監司具破
用數進

開元七年七月十一日勅總監破用錢物一事已上須

南衙勾當宜令總監自勾每月進一本歷來內自勾勘
寶歷二年十二月勅總監職掌官員並宜停廢一百二
十四人先屬諸軍各歸本司餘七百三人勒納牒身放
歸本管

開成五年四月勅總監宜令內官司管仍別置使其管
監及丞簿共四員宜並停

欽定四庫全書

唐會要
卷六十六

三十一

唐會要卷六十六